

景

文

集

一〇





景 文 集
(十)

宋 祁 撰

景文集卷五十八

誌銘

荆王墓誌銘

慶歷三年冬十二月，皇叔荆王疾病，辛丑，皇帝輦如其宮，見王臥內，禮如家人，上手爲調藥，王泣且謝，卽陳被恩三朝，無以報厚德，今保首領，仆牖下，倘使有知，從二先帝遊，死骨不朽，惟以兒女長累陛下，上惻然謂王素康強，雖今小恙，行且瘳，敕近醫藥以自愛，因賫白金五千兩，王固辭曰：「幸一見天子，奚賜之哉？」叨上高王之讓，特詔從之。明年春正月乙亥，遂薨，上卽時臨弔，哭之慟，廢五日朝，壬午，御素服，宰相率百官詣崇政門奉慰，遣中大夫相其室，以藏內事，詔翰林學士臣某、內侍省都知臣守忠、護其葬，以庀外事，制詔中書門下，其贈以天策上將軍，兗徐二州牧，燕王印綬，太常上諡爲恭肅，又詔臣祁爾應敍王治行，鏤碧款隧，俾永其傳，臣再拜稽首，伏自念懵學庸聞，不能周知王德，今天子展親飾終，震動顯幽，自王弗寧，遣太醫高手踵相及于路，逮終歸，賜不貲計，比葬，三酹其喪，則上之所以眷王，王之所以承上，其仁其賢，方付史氏，以昭無極，臣雖缺然牽綴，尙懼稱道失當，爲斯文羞，而日迫事嚴，不及誤避，是用詢玉牒，據行狀，次第其辭，謹按：王諱元儼，太宗皇帝第八子，母曰德妃，王于諸子最幼，太宗特愛之，終日侍左右，在

宮中真宗嗣統。王年十三。始以檢校太保。左衛上將軍。兼御史大夫。爵爲公。國于曹。進拜平海軍節度使。俄同中書門下平章事。加檢校太傅。爲廣陵郡王。授昭武安德二軍節度。真拜王以榮爲國。稍兼侍中。易安靜武信軍。檢校太尉。兼中書令。大中祥符八年。宮屋火。延燬內廬。坐火禁不謹。削武信一軍節度。降端王。始築宮于外。他日。謝上。痛自咎責。真宗嘉慰之。復以鎮海安化二帥節。改王于彭。冊拜太保。以天平易安化。拜太傅。以永清橫海帥節。更王通。繼授陝川大都督。合保平定國兩軍。又王涇。今上卽位。以地尊屬近。進拜太尉。尙書令。仍前兼。以鎮安忠武二鎮。徙王定。賜贊拜不名。又加詔書不名。頃之。更王鎮。賜劍履上殿。拜太師。以河陽三城二節度。卽王孟。翌日。行京兆尹。兼鳳翔尹。卽軍府爲節度。乃王荆。又進雍州牧。兼鳳翔牧。久之。以國在荆。授荆揚二州牧。卽荆南淮南南節度爲大使。仍賜入朝不趨。大抵賜功臣號者九。其文至二十有四。勳上柱國。階開府儀同三司。邑戶二萬七千。實食一萬二千四百。人臣之極。摯止矣。王美姿質。眉目如畫。廣額豐頤。舉止矜重。在平居無少懈。祀容恭。朝容莊。賓容肅。宴容侃侃而和。雖霞之軒然。麟之儀然。瑜潤而葩鮮。不足侔已。事德妃尤謹。每有疾。焚薰請命。而王進飯視妃一再以增減。居喪以孝稱。躬繪太宗聖容。纖微克肖。天光日潤。若可就而望者。性閒敏。博覽文史。好飛白書。拂灑逾妍。結字甚工。作辭賦數百篇。務求理致。寡嗜欲。左右姬侍。裁令奉巾櫛箕帚。不受佞諂。翦翦者或伺隙膚訴。必正色折愧。由是內外無違言。天聖以來。王自以春秋高。蒙殊禮。不敢數朝請。常闔門申申以居。會朝廷調軍興。

議省費。王卽表上公使錢歲五千萬佐用度。上不獲已。權許半入。以申王恭。晚節頗好絲竹亭觀。日夜自娛。蓋健粹所賦。必有寄于物。而后能適云。始天下之言貴而親莫若王。而王乃小心恭慎。在骨肉間。始終無纖芥。使宗室本支日愛以敦。語德與功。其何如哉。孫宜公爽嘗授經。必語人曰。王賢王也。世以爲知言。娶夫人張氏。彰德軍節度使永德之女。循法度。膺象服。承寧王家。以岐許晉三爲夫人國。不幸前七年薨。追命魏國夫人。子四人。男曰允熙。右監門衛大將軍。滁州刺史。贈博州防禦使。曰允良。鎮國軍節度觀察留後。曰允迪。靜難軍節度觀察留後。曰允初。汝州團練使。諸孫嬪然。或冠或笄。問安也。蟬蠶襲乎庭。來寧也。鏤悅交乎闈。此所謂朱芾皇皇。室家君王者哉。初魏國之葬也。當王墓之次。故卽用其穴。以三月庚寅。具鹵簿鼓吹。奉樟宮。自京師如河南之永安。以夏四月癸卯。啓魏國之塋。從禮而合諸墓。嗚呼。王之爲子孝。爲弟悌。爲叔父寵而虔。爲父義而有慈。甲子一終。啓手足焉。未爲頤而艾也。雖然。壽皇烈。憑天祉。駝鈕。整華餘四十年。忠孝之範光矣。榮哀之事終矣。銘曰。

太宗九支。潞篤于病。昭成弗永。眞宗受命。潤邢蘇華。竝王而藩。代天之工。咸罔登年。穆穆燕王。太宗所愛。眞宗則之。寵錫光大。上曰叔父。屬尊以親。不名不趨。劍履振振。王最壽耆。夾輔顯承。道具美完。纖訾不興。癸亥之冬。冰介木披。楚陳尤甚。襪氛前知。困而遺忠。神不奪守。勉訓諸子。表貸醫咎。上命中人。悉取其書。或筆或書。分藏石渠。厥仗央央。刻章煒煒。詔從儉葬。俾顯王美。永熙西原。橋梓後先。旣利旣安。以佑來昆。

皇從姪全州觀察使追封新興侯墓誌銘

侯諱從郁字仲文昭信軍節度使英國公惟憲之子母曰莒國和夫人英公之禰曰潭王德芳自潭而上昭穆嚴尊玉牒史官書之故不著獨著侯事侯幼悟警有志行羣居而自修佚安而不流既就傅務學尤力臨虞世南隸楷絕工射能命中景祐中悉召宗室觀書太清樓詔侯賦詩應旨輒上帝稱善他日有詔褒美輦下榮之于慶歷元年夏六月遘疾薨于第享年四十有四上爲廢朝敕中貴人護葬所以賜舍追卹之良厚留窆普濟禪坊卜兆之未從且言懷也侯仕始右班殿直十遷至左屯衛大將軍文州刺史爵階勳邑稱是配曰夫人河東薛氏封丹陽郡君甚宜其家六男子世弈太子右衛率府率世襲故太子右司禦率府率世將太子右監門率府副率世秩故太子右內率府副率世覲太子右內率府副率幼未名諸子皆孝謹以肥家則侯之垂裕當有致之者歲直涪灘始詔鴻臚啓殯卽河南永安之先塋月舍己巳日舍癸卯克葬贈全州觀察使新興侯禮也昔詩人之稱文王其辭曰文王孫子本支百世我祖宗受命而帝德溥流長過文王遠甚而其支胄蕃衍雖千萬世尙無有底止則文字之傳可以已乎銘曰帝孫之子釁我不祉嗣而承者何千萬祀

防禦使進封饒陽侯墓誌銘

今上景祐初念雅樂猶缺詔太常攷鐘石之縣質同律之制時羣臣多不能曉或妄以縱黍累尺改定均

度上依違未決。乃自譜正聲。付授樂家。益召知音者以備顧問。于是左千牛衛大將軍克己。字安仁。以宗室子名知音。上遣使卽其家。俾製黃鐘大曲。將軍疏牘論次。成不淹晷。使者還奏。大蒙賞嘆。又進別曲十餘解。往往流布樂府。將軍自爲兒時。已能言五音十二管。夫婦上下相生之法。君臣清濁之差。汪洋闡衍。支脈連著。皆有所從。繪爲律呂圖奏御。其心解神悟。殆天性然者。習羲之草。世南隸楷。尤工。會天子族讌酒中。被詔試虞楷。并有所賦。將軍旣感千載之逢。矜稽古之習。援筆足言。爛然盈幅。上益嘉之。厚以金帛爲賞。營第所自爲詩三百篇。行于時。他日。寢疾。內夫人傳旨撫存。將軍以寵待異等。頓首泣謝曰。臣死不恨。遂歿。天子輟朝嗟悼。贈深州防禦使。進封饒陽侯。自歛訖殯。無慮所須。一從官給。嗚呼。終之令而哀之榮。謂將軍也歟。顯考諱承壽。均州防禦使。祖考諱德恭。高密郡王。郡王之禰則秦悼王。靈後隕祉。源長而根殖也。夫人長寧縣君武氏。生三子。叔詔。叔曠。竝太子右監門率府副率。叔褒。太子右內率府副率。慶歷四年。旣克葬燕王。凡諸下之未兆者。皆舉從之。別遣內常侍將柳而南。如汝州之梁縣。敍安于先塋。史臣被詔刻石著將軍之行。宜無愧辭。銘曰。

性也重厚。不聲以色。服也儒術。惟敏而力。仕由廷臣。七遷厥官。階崇爵顯。勳峻戶蕃。謂仁必壽。胡我不信。侯年四十。喑然委順。孟夏癸卯。克葬我侯。息焉于此。運往名留。

皇從兄贈虔州觀察使墓誌銘

秦悼王之穆曰廣陵郡王王之合曰南陽郡君張夫人有子八房嫡房曰贈虔州觀察使曾禰不書尊帝也王諱不書著也公名承睦以皇根之茂天跼之華芳酣烈飢遂用蕃衍直質而不跲遜志而自修斤斤奉法日以飭厲守貴而無驕色處樂而無流心自右侍禁踐八官而至左領軍彭州團練使朝家厚宗室悉留京師雖疏爵而王列藩而侯揭節而使佩印而相未有就國而操事也不就國則親親之誼戚而弗疏不操事則優優之祿肆而弗畏有如公高冠大帶朝殿庀之下量幣黃流祀家寢之庭資忠移孝靡有罪悔奚其爲政而後爲之功業哉命之弗謫享年四十有八天子輟朝行臨弔之禮中人奉詔護喪窆之事出中帑以禋之厥廉車以飾之棺于寢階殯于蘭若須時也後三年歲直甲申分遣使者啓菽柩卜夏四月癸卯還葬汝州之梁縣以夫人隴西郡君董氏祔焉男六人克順克戒太子右衛率府率克協克凝克伸右監門衛率府副率克囊右內率府副率有詔史臣銘其壙銘曰鬱鬱芊芊惟汝陽兮若斧若堂從家王兮子也承祀其代昌兮

李郡王墓誌銘

皇祐二年秋七月有宋元舅彰德軍節度使檢校太尉兼侍中李公用和以羸疾聞太醫更往治弗損丙申乘輿臨問公病不能束紳臥簣泣謝上念公居告久又素不殖產賜銀三千兩爲醫祝費斥官舍百餘區歲餼二百萬與之使長食其貲卽賜所居爲公第又以次子西上關門副使珣爲正使二子一孫未仕

者賦其祿。皆拜牀下。甲辰公薨。上震惻。是日臨弔。哭且慟。贈輓絡繹。遺命辭詔葬。故遣近侍及中大夫職喪事。冊贈太師中書令隴西郡王。五日不視朝。賜諡曰恭禧。壬子。帝舉哀苑次。將卜葬。以八月甲申吉。諸子號踊荒痛。乃庀具有詔葬。日以本品鹵簿寵之。又命史臣次王之行。鑲石藏于槨。謹按。王字審禮。系出隴西。遠祖徙餘杭。既又來京師。故今士著始爲開封人。曾祖諱應已。隱不自名。曾妣曰沈夫人。祖諱延嗣。舉進士乙科。終金華主簿。祖妣曰汪夫人。考諱仁德。以進士試有司。數黜。晚乃選爲三班奉職。終左班殿直。妣曰章夫人。惟夫人克生元女。嬪帝誕聖。柔風順教。佐治六宮。終享大號。祔主廟祔。是爲章懿皇后。前後延資三世。竝以太師中書令兼尙書令告第。以舒邢魏爲三公國。吳陳楚爲三太夫人國。厥錕刻章。羅照窰塗。王卽后母弟。少孤。內行修謹。釋褐衣。召爲廷臣。試事連最。益知名。以右侍禁閣門祇候出監考城兵。明道元年。會章懿喪。除禮賓副使。其年大考宮室。以分護勞。正爲禮賓使。明年改治后陵。王參相奉安。帝念后昆弟惟王。思有褒寵。故擢崇儀使兼賀州刺史。將驩騎輕兵護梓宮。明年詔王親展寢園。還爲寧州刺史。改刺澤州。并本州團練使。又遷慶州。加防禦使。拜鄜州觀察使。自賀及鄜不卽州。領皇城兵。寶元二年。仍使號充殿前都虞侯。俄加永清軍節度觀察留後。以帥職出爲眞定府定州路兵馬副都部署。踰年遷侍衛親軍步軍副都指揮使。更爲兵馬都部署。召還視本司事。未幾改帥馬軍。慶歷二年拜建武軍節度使。充殿前副指揮使。久之以建武節進檢校太傅。充宣徽北院使。不踰月授彰德節。同中書門下平

章事。王既尊威慎將。當日進見省戶下。故不之鎮。留爲景靈宮使。居再歲。升門下二品。王臨事強敏。然性靜畏。見可以佐縣官者。避戚屬。未嘗顯爭得失。率一二密對。故外莫得聞。不爲狗馬玩好驅馳弋獵。不立居宅。檢御姻族。使循法度。此則馬廖之慎也。先后之啓故陵。灑泐方中。詔王按視。中外爲懼。王不一辭措枉于人。物色申右。帝意解。故簿主者罪往往得原。此則樊宏之畏也。前後居爪牙任。爲國禦侮。巖廊尊榮。不疎不諱。退視微道。按周廬。省幕府。文書惟謹。建白時當。有司率爲故常。在河北尤善撫士。修完器械。勉怯爲勇。易單爲牢。悉公錢享部校僚屬。無留私。景祐中。再郊。王兩爲大內善守。此則申伯之武也。初。王無第。詔權舍芳林園。王以禁籞非人臣所居。固辭。更假今第。此則竇長君之能讓也。領殿前兵。歷四基。後數請閒避劇任。帝曰。叔舅誠年高。尙煩以職事。非所以優之。由是開府視宰相。每朝會大宴。與執政聯坐。鳴玉珥貂。進退恂然。親寵第一。嘗屬疾。輦過候安否。勉醫藥。賜予千萬。又以王經過郊墅。別賜銀飾安輿。此則鄧騭之貴也。大抵外戚在朝廷。預進退。士干議論。則近權。權且有黨。滋貨買田。通四方餉謝。則近侈。侈則多求。王居常謝賓客。罕所薦進。朝或大議論。不敢知。故無黨。無黨則權不往。用度一出俸稍。抑絕苞苴。其爲子孫謀。盡仰所賜產。故求寡。求寡則侈不至。且王肺腑要重。苟有開說于上。勢宜聽。糜金錢嗜所欲。厚自奉養。人亦無所詆疵。而天資儉約。終不舍此爲彼。使屬任之恩。始終蔭密。不曰賢哉。凡功臣號再加。階光祿大夫。勳上柱國。爵開國公。虛食邑四千戶。夫人王氏。以淑懿之行。助宗事。幹內法。偕王之貴。封榮

國夫人。生男子九。曰璋、珣、琚、琦、瑋、球、瑛、某。璋爲眉州刺史兼防禦使。領龍神衛四廂都指揮使。珣卽前拜閣門使者。琚琦瑋球晉任內殿承制崇班。瑋爲濱州刺史。初上欲與王世爲甥舅。故詔瑋尙福康公主。主待年。瑋前拜駙馬都尉。瑛爲東都供奉官。早夭。贈如京使某州刺史。或以沈果進。或以敏幹聞。或以謹厚選。其能濟王之美而不隕也。惟邢公而上墳墓在餘杭。自魏公始塋。開封府祥符縣鄧公鄉原。窆于昭位。今克葬王于魏公之左。爲穆位禮也。昔秦康公以路車乘馬贈送晉侯。作渭陽之詩。人微事陋。仲尼以爲可傳。追什其風。況乎寵外家。褒哲輔。卹終表賢。儀物典冊。光明肆大。極天子親親之恩。慰先后在天之慈。庸得不識。銘曰。

王之先。赤舄綿綿。乃自餘杭。引而北遷。充顯魏公。賜始家田。度汴之陽。大表厥阡。王之貴。照發于他。帝所自出。親則舅家。忠力謹庸。福祿是荷。台臣之印。上將之牙。王之亡。帝慟且傷。五不視朝。哀襲總裳。師令王爵。追密厥章。歸贈易名。恩縟于常。王之葬。圖于塋穆。既有祕器。皎珠賸玉。鼓吹轟鐸。旂旒熠煜。我且不朽。彼則陵谷。王之後。誅誅而榮。或築外館。有提衛兵。佩鏘其珩。冠翠其纓。爾公爾侯。永嗣家聲。

文正王公墓誌銘

景祐二年。丞相右府缺。上方圖任耆俊。參付魁極。越二年。制詔太原王公會。其上樞密使印綬。還來相予。進拜尙書右僕射。門下侍郎。所以命賜之尤渥。公拜稽首讓。弗遂。于是擇典訓庸。以熙百工。外懷邇協。以

種九德。飴味變和。辰階比平。翼戴聖猷。溥大光明。迺十一月。從欽天桀。胙沂以爲公國。他日。請間伏青蒲。上陳瘁薊。嬰霜露以踣。願前此納政。避賢人路。帝憮然無開可意。公執不奪。卒改左僕射。加資政殿大學士。鎮東平。戊寅仲冬。感疥。門子謁急書聞。亟命將高手醫跳驅趣視。不半道。丙午。公薨。上推甲子。得三百六十六。復所生之辰。家丞列治。讓還鴻臚典葬。天子悼遺老之弗慙也。再所置朝。厥左貂以禋。法賄備厚。恩錄宗姻僚陪十人。容官合文正二言以諡周道。公之喪來京師。其引也。蓋殯也。邦人官師沱涕相弔。明年。有司持丁亥詔書到公第。仍舉中書令密章以告。愍册焜煌。再漏下泉。本公之綢繆感會。寵存賁往。有以致者。其如仁歟。其司直歟。公字孝先。由逸民霸。飛遁天漢。顯某素德。支裔屢徙。今爲青州益都著姓。曾祖諱鐸。祖諱繼華。皆陰儲世烈。考諱兼。甘節難進。終著作佐郎。深根浚源。藪沛來祉。公貴推澤。竝贈開府儀同三司。尚書令。中書令。爵皆爲公。大王父國于越。父國于魯。妣曰張。別贈燕夫人。曰何。爲魯夫人。公卽何夫人之子。軒渠卓異。魯公曰。是大吾門。八歲。終二喪。斬焉致毀。仲父宗元育之。過所生。一情以均。公亦以所愛事仲父如父。甫冠。與鄉士游。汎博書記。不爲章句儒。諸老先生皆折輩行以交。咸平中。偕郡上計。委符入關。策進士。再爲天下第一。當此時。二篇賦學者爭傳都紙。以鵠鵠王佐期之。初命將作監丞。通治濟陽。代還。試政事堂。以大著作直太史。服五品。判三司戶部案。轉右正言。知制誥。服三品。充史館修撰。入翰林爲學士。自司計外郎再遷至中兵。拜諫議大夫。參議大政。加給事中。以禮部侍郎守應天大名兩府。

復貳鼎席兼太子賓客。由左戶再遷至春官卿。以內書侍郎執宰相筆。陟東臺兼地官。遂躋上衮。闕五歲。琳宮火。一昔焚。冊災異。免以天官爲本州。又易天雄軍。卽拜彰德軍節度使。檢校太尉。稍換天平軍。檢校太師。俄同中書門下平章事。徙判河南府。入冠樞極。罷幢檠。還冢宰。他如故。公由布衣狃君門。譽處時行。爲龍光景式。凡三十七年。別任九判大理。尙書都省。登聞檢。知審刑。審官。禮儀院。通進銀臺司。門下封駁事。洫三班院糾察在京刑獄。領使五。持金絮遺湟水酋。爲生辰使。輦謁譙祠。爲攷制度使。館寓神嶽。以中台爲會靈觀。使高眞寶符。以元輔爲玉清昭應宮使。再見上帝。爲南郊大禮使。主工部一。由集賢殿昭文館及西清之祕。爲大學士三。監修國史一。階一品。勳十二轉。表功十有四字。食虛邑萬有二千五百室。實五千一百室。此踐揚隆赫。其大較也。初契丹侵邊。濟爲寰服最近。早符晏檄。悉索賦佐軍興。公由倖事。疏一二便宜。數奏蒙可。衆器其能。天禧夜妖自三川相靡而東。公守睢陽。不遑謹恐。里閭晝闔。公關牙門。分吏曉勒。捕先倡者鞭梏之。妖熄不復南。築雒都城。周萬雉。雲陣言言。辰居以尊。復陝路轉粟歲二十萬。饒得無乏。歲旱蝗。齊楚周什八以上民曹逃。貸困粟。鄉縣株送。公一切勝遣。流瘠更生以千計。所至立學官。分租俸。助興作。五州鑄金石以頌。魏人畫像事之。課治者以公爲尤。綠圖夜降。度宮以儀典客。礪石庀材。規創萬楹。公列五害。願省損制度。奉承大中之意。先帝弗豫。太子已決事。或議長秋臨政。儉人甚語翕翕。公時調護儲邸。謂后姻倖曰。太子長秋誼不獨立。有如兩宮相維。社稷安矣。后悟。由是內外恭順無違言。

莊獻總軍國。儀不時立。佞黨投罇。廷議放肆。公獨引東漢故事。朝則帝在左。太后在右。施簾自障。羣臣奏事如前。詔如公請。長樂上徽冊。供張天安殿中。公執不可。改御文德。差損展座。志在彊王室。安外家。使無纖芥。納忠者以公爲盡。大理總天下獄。異時爲冗。帝欲重之。公自西臺被選。平亭訊讞。許自辟丞屬。遂踵爲故事。法家有違制而情不一。公請非親被以失論。會其獄須報。公據前例。帝曰。自是無復有違制耶。公曰。如陛下言。亦無復有失者。帝悅。更從輕生。語材者器公之果。踐內外辭禁。贊爲名命。渾灝炳純。溯古同風。或選爲昌言。或永爲廣歌。則家集合五十六篇。詳矣。上始鄉學。公采聖君賢臣事。繪解爲三十篇。因以勸成德美。語鏤于槩。徧賜邇臣。其他纂次尤多。尙不錄。言文者歸公之治。嗚呼。惟公侃然正。崖然立。周密靖慎。久而無流心。在上前開陳處。再辦博有餘言。爲國家用。至日旰出沐燕私。訖不道省中語。天資方重。每廣朝大會。盛服正色。郎謁者視進止。如有尺寸未嘗過缺。雖妄庸人歷嗤詆。亦不能加半言毀短于公。當國七年。萬物茂宜。四夷休寧。稼茨于原。兵仆于鄙。嘉生回薄。無有恫怨。務大體若丙吉。清淨如曹參。總領衆職如魏相。內文明如鄧禹。于時被公之化。察察者敦。沾沾者愧。建啓露門祕禁。召惇儒碩老。侍撓勸講。復諫署舊員。使正辭謬議。日興于朝。進賢不植私。愛士不謀黨。退不肖。不奸怨。奉羣母孝。與諸弟友。親族可任。言之上。不可任。厚分之財。姻婭進用。皆以嫌自退。上嘗大書忠亮忠厚四字錫之。天下稱爲賢公。乾興天聖之際。時多故矣。身荷重任。爲國休戚。雖參和傅會。權定大事。積被怒牙。浣其他腸。庇焉如帡幪。

慮焉如蓍蔡然至閒居獨念猶感慨以之是必彌綸之才軋于羣媚而未悉獲聘健粹之氣有所難屈而弗憊于心煩慮焚和且至大病斯可憫已先時大星辰落郡寢上左右驚白公曰後一月乃自知之如期而始悟寧傳箕蕭昂有憑以始亦有以終耶君子謂爲知命公始合姓于蔡實處士光濟之女又合姓于李故相文靖公之女卒繼室以其妹芳猷淑則迭映中壺後夫人獨偕公老故敗許國享脂田焉書哭未基又不幸以榆衣而復母弟曰皞字子融爲刑部郎中直集賢院曰憫字孝德終國子博士子四人曰綱緣綱止光祿寺丞緣天閣綱止將作監丞釋爲光祿寺丞釋之幼公取皞子釋以嗣及終又命之故釋卽喪序今爲大理寺丞祕閣校理公之捐館以大墓無穆位不可以葬乃改卜于滎陽惟新鄭吉又筮于臨濟鄉惟梁原吉先是蔡夫人之歿已祔于姑歲在單閼冬十月乙酉子融與釋等竭誠信舉公及二夫人之喪合窆新阡順也且求狀于太子中允直集賢院富弼又自哀公行一事一篇合前後贊書見授而爲之誌恭惟令君之德在生人其憲度在臺閣其言在謨命其履踐在國書其人與不可傳者皆亡矣今所摺次姑舉搢紳所道者著于篇而納之壙中銘曰

斤斤令君。竭來山東。利見國光。參偶時龍。旣奮厥庸。遂爲宗工。訂平津之封兮。上初纂嗣。母闈參治。揭日當天。實相以濟。讒脣不搖。王室無基。賴陳平之智兮。五藩于宣。旣仁且賢。邦民宜之。厥猶茂焉。乃建將牙。乃示台躔。繫吉甫之憲兮。鄭圃聯圻。泉塗啓扉。刻章美楨。終天此依。九京千載。景仰餘徽。惟隨武之歸兮。

僕射孫宣公墓誌銘

聖上嗣位之初，丕承淳烈，將以雍言布度，召雋老惇儒入崇政殿中，以興金華之學。時惟樂安孫公奭，幡顛魁壘，授道帷幄，辰告日躋，淵靜揚休，出入十年，厥猷茂焉。乃天聖辛未歲，以惇暮告勞，上還所事。天子雅貪公肅艾之望，倚以訪逮，需奏三上，皆不報。公面自陳啓，頓顙流泣，帝爲改容，第許以兗州之章，申几杖之俟。猶命講老子三章，重以束帛乘馬，襲衣銀帶，命賜備厚。冲概以光，乘輿燕于太清樓，別詔近臣，餞于瑞聖苑，敕預會者賦詩，必類，且錫天什，寵賁其行。師臣禮遇，實無與二。公居東一年，上書求謝，惴惴愿確，朝議重違，進拜太子少傅，以安車還汶上。明年夏五月，感疾甚篤，己丑，奉裨衣復于東榮，實明道癸酉，于是公之生七十二年矣。訃聞，帝震悼廢朝，制贈文昌左相，贈泉二十萬，錄孤若孫一官，易名曰宣。嗚呼，哀與榮更相終始，其所以得之者，有猷有爲，故耶？公字宗古，代爲本郡著姓，由公徙居于郕，今又爲郕人。諱竊，曾王父也，練王父也，翌烈考也，饒夫人嫡妣也，丁夫人繼妣也，率祖而上，皆毓德丘里，不經世務，考槃在志，以篤睦肥家，叢鬱慶祥。侯公而發，烈考累封光祿少卿致仕，贈兵部尙書。二夫人以鄱陽濟陽二郡賁湯沐之典，從子貴也。公強志精力，爲諸生時，已通五經之說，百家之藝，游長者間，久之，名聞京師，端拱中，擢明經高第，自釋褐，閱十七官，更五職，咸以最顯，由莒縣主簿授廷尉平，參大成均之屬，轉本寺丞，遷尙書省，又講經于諸侯王邸，升奉常爲博士，入尙書臺爲屯田都官，職方三員外，以司平中兵二郎中。

待禁閣之制。改諫議大夫給事。合六官踐其四。以小司空累遷至太宗伯。並兼玉堂講勸之任。小司馬時。又帖祕圖侍從之職。裕于德而應于仕也。位十一局。爲審官三。吏銓三班各一。其啓擬無滯材。署銀臺封駁再判國鼓一。其進退無壅情。糾京獄。罰以麗。使牧校。騶斯材。總大農。事以給。太常。太學。客官。皆洊領焉。舊章之不忘。抑公是賴。三守邦治。高密五年。孟津三年。魯郡再並葺年。仁厚愛利。除一切之禁。風聲化條。爲二千石表。簡任之尤者。則章聖上封之歲。假節境上。諭安遼人。通聘于暨無間之落。又接其使于藁館。道二國之言。無私冊號。鬱蒼介使。輶之華。程較俊選。精官材之辨。增修商苑。舊任寵其遺利。歸之縣官。十累階。止正奉大夫。七論勳。至上柱國。開國爵爲公。食邑稱是。其發揚烜赫如此。在太宗時。釐過庠舍。公自下陳。捧經升階。講說命三篇。因古順諷。音旨華暢。帝大褒挹。卽賜五品袍魚。羣聽始竦。在眞宗時。屬柴梁岱。橫河汾。擁符瑞之富。羣臣爭欲推天意。與希閣之事。天子方憑翠帽。徜徉瀨鄉之區。眇然以思聖眞之遺風。公獨建言危微之本。愆乎所忽。且引唐開元終悼後艱爲戒。帝亮其懇至。多所開納。然猶著論以剖公之疑。時郡國多上瑞物。公問得見。具言珍禽異卉爲和氣所蔓。以昭盛德。然脫有竄僞。非應天之實。又言道家祠醮。所費不貲。以愛嗇財用爲急。書數十上。啓心進熟。靡所回隱。皆可以紓國庇民。興天下長利。卓然有古風烈。彼齷齪容容。毋忠固意。且不得與公徒隸齒。眞可愧也。及在經省。則取無逸篇繪圖以進。詩書道前王喪亂。進讀者臨文卹忌。或粗略含糊。公獨不然。必爲正言之。冀以多識故常。有所裨勸。能納

君于善矣。公之典禮也。始請無祫而後農。冬至侍祠于郊。以天神饗食。宗廟復二舞雍徹。孔廟三獻有官。迄今奉行爲故事。唐禮。祈穀大雩。大饗並祀昊天五帝。國朝因之。公上言位號重複。不合正禮。且天無二帝。特以五時生育之功。強爲六名。冬至圓丘宜罷五帝位。孟春禘感帝位。日于東。月于西。以會禮家大報。天主日配以月之文。雩饗宜祀五帝。不設昊天攢題。事下有司。咸謂祀爲大事。舉而廢之。不以疑定議。卒報罷。然服公論據精治。願下其書于史館。則神不瀆矣。初公患五經章句浮長。刪爲節解數百篇。取九經之治要。著微言五十篇。實被詔獎。作樂記圖。承詔撰崇社錄。次五服年月。爲一家之言。奉和兩朝聖製。著賡載集。體尙沈雅。不爲華藻。自七經之疏。皆與判正。史志子篇律學。未鏤官槧。以次建白。自是流布。學者仰之。殆如杓然。終始典于學矣。舉動溫重。外和而內莊。譬于莫在匣。隱然常若可畏。何隆名重器。不植黨援。而盜言哆箕。無所奇中。由慎密以自將歟。性純孝。篤于溫清。旣荷囊珥筆。朝夕禁近。不得休沐過家。而烈考尙書又重去鄉里。歲時上壽。公弗及預。數上書辭官從養。帝頗難之。于是有左符之授。再徙地益東。蓋公志也。尙書年過九十。公亦耆。指使尙就子舍。曳斑裳。言不稱老。養者以爲榮。及時侍疾也。不嘗藥。不進。不復飯不甘。鄒魯之人多能言其行。練達臺閣制度。有咨無不得判。議者以許東京胡廣。而持正過之。善知人。精于評鑒。今左戶二鄉始平馮公。初在黃綬。公亟薦于朝。至于光大發舒。綢繆累聖。與接武露門。俱名儒宗。及馮浴堂之召。遂讓其班而居公下。清議咨美。其他推轂士甚衆。雖未大顯。皆休有令聲。俊

父用章。繫公爲重。處約居易。讓夷難進。不疚利于回。不愧祝于辭。甘是介節。訖無恫悔。及菟裘之還也。召鄉人諸父。揮金以爲歡。海鯤冥鴻。所造而適。撒瑟之夕。前處正寢。以諗考終之期。物怪氣焰。罔形請禱。獨召子姓。以按治命。屏御不使進。且曰。以齊吾終。遺禮惓惓止于獻納。傳稱得正而斃焉。斯已矣。又云。旣歿。其言立。此之謂不朽。如公實參有之。夫人天水趙氏。服珈鈿之華。能循法度。老不逮享。追封本郡三子。長曰瑤。次曰琪。季曰瑜。由公任各以材力進。瑤歷司虞員外郎。琪爲屯衛丞。並早世。瑜今爲殿中丞。諸孫逮公之廕。爲卿寺屬者五人。殿中君以公殯之未訖。求爲本州賓介。怵懼摧怛。奔問于陽卜。得今丙子歲冬十月癸酉吉。奉公及夫人之喪。克窆于某縣某鄉某原。從先塋之穆位。順也。以祁曩爲經生。實被公薦。參掌儀署。又節惠以舉周。法知公之績也。熟見託論議。是用次敘其行而納于窆。挺銘曰。

猗歟公之文。慮憲秉彝。式是古訓。進爲經師。挾策立言。刪剡游枝。擧其蕤兮。猗歟公之仕。可辰展美。其弁頎然。其纓華止。不蹈九折。安我六轡。坦斯履兮。猗歟公之德。方嚴直清。鎮浮含厚。不伐存誠。匪躬蹇蹇。受命青青。時則行兮。猗歟公之老。在汶之陽。貴屏國爵。宇發天光。弋者愈慕。鷦鷯已翔。壽俾臧兮。義鬣封兮。序先域。壘密璽兮。照窀穸。子克荷兮。孫繩繩。奉二尊兮。安此宅。褒善猷兮。刻沈砥。砥可泐兮。名無垠。

景文集卷五十九

誌銘

文憲章公墓誌銘

宋有清忠肅艾之相曰章公諱得象其先齊太公裔封于鄆去邑爲章氏僑徙不常後爲武甯望姓曾祖仁嵩仕李昇爲駕部郎中以公故贈太師中書令曾妣杜楚國太夫人祖士廉汀州寧化令贈太師中書令祖妣周齊國太夫人考奐志耿介以儒術發聞不樂進取試禮部一不中卽謝去盤桓家食以天爵自終贈太師尚書令兼中書令密國公妣張秦國太夫人世烈前光幽而後融委報于公公孩提已自秀挺卅能屬文年十二修袂挾策與密公及從兄得一俱稱茂才當時夙儒願與周旋不以丈人行自謂咸平五年舉進士授大理評事知邵武軍歸化縣以喪未赴服除用大理丞爲信州玉山縣會東封泰山大臣引公簽署兗州觀察判官事以辦治勞遷太常博士通判明歲以屯田都官二員外歷知台南雄洪三州事會詔近臣舉學優行茂者以名聞時文靖呂丞相諫大夫張師德聯牘上言試學士院以職方員外直史館入三司度支部爲判官歷祠部郎中賜五品服改刑部曹糾察在京刑獄賜三品服公自釋褐卽外遷閒關遠方幾二十年摺紳未甚知者及還游諸公間器就德完一口交譽姿表頎茂所至輒傾坐客視

上聞如接下侃如。中陶然粹。外頽然簡。照通量含。不見崖畛。天下遂推爲鉅人長者。以兵部郎中試中書。進知制誥。明年入翰林爲學士。公于名命得輕重體要。進無盈褻。退無溢尤。至他詔令。皆便時制宜。使聽受施行者徧曉。多至數百千篇。卽本職改諫議大夫。以喪去官。有詔奪服。號訴不見聽。累遷爲禮部侍郎。又兼龍圖閣學士。俄拜承旨。兼侍讀學士。摘經驗古。勸成風德。在內外辭禁。凡一終星。異時與公嘗僚。或出公下者。武相踵爲柄臣。然愈謙晦。無纖介缺望。不爲赫赫名自結。其澹于進取乃如此。視積薪倒行。不得輩公廝早。尙敢望其藩哉。惟天子以爲國器。可大任。景佑三年。乃擢同知樞密院。尋改戶部侍郎。毗變內機。底裏輸盡。參和協恭。道益光明。帝曰。爾遂相。寶元元年。以本官拜中書門下平章事。邊障驛騷。老師留屯。上所與閱。赤白囊。按邊吏才不肖。調兵食。止一二樞近。裁可奉行。議者謂三公無不統兵。獨大事有不預知。方多故時。不容偏任。天子向其言。始命宰相兼樞密使。仍進公中書侍郎。兼工部尙書。公授使。讓還其官。在上前論事。或日旰。別白精審。無所回忌。時天下承平久。器蠱未牢。兵耗不登。公與呂丞相共議。閱良家子數十萬。補完虛籍。益市馬充車騎。爲蒐教之法。討于軍。謹修繕之令。督于官。減用度之冗。謹其財。所以懔威常武。紓國庇民者。咸見納用。會呂丞相病免。復以冬官命公。遂爲上宰。公旣久當國。且畏盛滿。晝諗夕咨。慮煩必傷。乃頓首乞還丞相印。詔不許。表至十上。未得報。則還第待罪。天子手詔曰。須郊祠畢。更一年乃聽。公以敦諭諄切。不敢違。然志遠名寵。每奏事。或獨留。且陳年侵疾癰。言誠哀到。慶歷五年。

始得以檢校太傅、鎮安軍節度、視相秩卽判其州。七年，進封郇國公。明年，徙留西洛。朝京師，遂請老。時議以圖任耆駿，不應以年爲解。公執益固，上度不可留，特拜司空致仕。賜實俸，著令燕見禮如丞相。于是公年七十一，去位之六月乙未，暴感疾，一日薨。詔遣太醫馳視，已不於爲計聞。天子卽日幸其第，旣醑，哀甚，賜銀三千兩。他贈襚稱之舊制。大臣罷退，有物故乘輿不臨喪。又是日當休，法從或出沐，而詔蹕遽行，且使走諭二府以殊禮待公意，再不視朝。追贈太尉兼侍中，進二子一孫官。推叙宗姪者六人，公無主饋嗣。且幼，止遣中人省實家貲，簿付宗老，舉不滿萬金。裁俸賜所贏，嗚呼！隱卒喪終，寵孤卹私之恩極矣。蓋公之納忠也至，故報禮也稱。朝野涕咨，謂之榮哀。前夫人張氏，未及公顯，故君清河縣。後夫人楊氏，偕公貴，故國于郇。男五，釋之終大理評事，約之終光祿寺丞，介之終太常寺太祝，延之大理寺丞，公得謝，特賜緋袍銀魚，修之大理評事，皆儼然在次。號瘠如禮，于是發龜筮，合內外姻與謀，以秋九月某日，克葬公于許州陽翟縣三封之原，以二夫人祔。初，母夫人捐養京師，命不還葬，于是作新塋，乃令異位同域。庶公之志公興諸生，進官于朝，其踐歷大概著矣。至總局如審官、審刑、太常禮三院，尙書都省、通進、銀臺、羣牧使、昭文館、會靈觀，奉使則再充契丹國信，特選則知禮部貢舉，權置則南郊禮儀大禮使，常兼則集賢昭文二大學士、監修國史、譯經潤文使，皆餘功他閥，便蕃烜赫，至善狀尙多，不得詳勳階爵，竝極本品。功臣文四十邑，食萬戶，實食三之一。公不喜爲儼厲行，要以天下中庸自居，薦寵士大夫，惟力所視，無有愛惜，苟顯

于時弗帝己自出與人交久而益親仕十六官未始有毫髮譴咎雖長喙緩頰不敢加非于公不植私不援黨家無言利之老室無徼福之祈在宰相府務總綱紀去煩苛臨大事從容鎮靜無遽色亟言見于幾微士之辨銳自喜者或上謁有所開說公爲陳大體皆語塞自引去至上書過贊宰政天子下其章他輔臣欲讐實所言公第置之無所辨監司繩切州縣更約束劾發微密所至紛然公白其非是時急于吏課一切聽之未幾議不以爲便舉皆復故輔政八年章程修明其嘉猷納之上庶績付之有司功名勢地皆一不取故論者但美公德不能言其所以德彼挈挈可名者果其細耶公善行草書筆法遒婉時人弄牘祕愛論著文章數百篇雅懿沈鬱薄天人之極其爲章惠太后冊上最稱善奉詔撰御書梵字後記鋪衍宏麗文林隳服噫天與善人舊矣又曰仁者壽挾二必然之理與公之嗇和不能抗有定之數使登期頤固所謂不盡信而難誡者哉古之遭時君必終始自託然始未嘗不隆而後稍薄也如公疊寵蕃數存無比而殁有加焉易名之曰太常諡曰文憲至內外無間言全德哉若人僕辱公知且其嗣有請遂爲之銘在宋四世帝功極熾顯顯有郇實相而濟二陞休寧時公之功薰以太和物夥歲豐遂安元元以揉萬邦乘車嘽嘽高牙言言公有文武之翰之蕃既老而傳頓首乞身天子有命爾作司空弗職以勞安嗇而沖公有陰德大濟于時宜永斯年乃不期頤六飛駸駸厥第是臨裨衣豐貂既綏乃厥賁柩榮終誰克之如本公忠勞感會有初降體頌濱大宵無晨孰襄厥事若子而孫下有千載追慕如仁

石太傅墓誌銘

皇祐九年八月乙酉。太子少師致仕石公中立薨于京師。年七十八。天子廢朝。敕有司歸其贈。以太子太傅印綬告第。諡曰文定。十二月庚申。諸孫奉公及王夫人之喪。克葬于河南府洛陽縣宣武原。從先僕射元懿公之塋。公字表臣。今爲河南人。年十三。以功臣子擢西頭供奉官。非其好。讓家財與諸父。更衣逢掖方領。從舊老伏膺爲文詞。獻南闕下。換光祿寺丞。賜朝散服。咸平三年。以殿中直集賢院。眞宗旣獲元符。遂上泰山。瘞汾陽。表刻金石。以明德意。公爲作聲詩。那然以告成功者數十篇。旣奏御。益知名。天子好文。而號略楊億以雄渾奧。衍革五代之弊。公與中山劉筠。潁川陳越。推而肆之。故天下靡然變風。朝廷每有論次。公常在選。自中祕書無不讀。校正舛疑。無不經意。故二館以公爲法。由刑部員外郎。銀青服。賜金紫。上卽位。以戶部郎中充史館修撰。由吏部知制誥。稍遷諫大夫。給事中。召入翰林爲學士。進禮部侍郎。加承旨。兼龍圖閣學士。公于仕最先進。中偃蹇不遷。階積考升。至是已六十餘。同車茵聯。薨位者。皆平日子。姓行。或在公右。然未嘗有少缺望。歷內外制十二年。不一請間爲進取地。上念公終長者。故以本官參知政事。公善言臺閣舊章。袞袞不窮。以此佐上。多所助益。明年。轉戶部侍郎。罷爲資政殿學士。久之。加大學士。轉吏部。用太子少傅歸老。後五年。進少師。凡歷二十官。五學士。使契丹。知禮部貢院。兼要職。尙十餘局。非輕重所繫。故不論階。二品。勳極轉。虛實食三千七百戶。曾祖廷威。梁幽州節度副使。贈太傅。曾祖妣。

張氏追封中山郡太夫人。祖繼遠。贈太師。祖妣牛氏。追封平陽郡太夫人。侯氏。河南郡太夫人。禰熙載。右僕射。贈太師。尚書令。中書令。代國公。妣夫人張氏。追封南陽郡太夫人。後張氏。安定郡太夫人。僕射有功。于時配食太宗廟。風烈爛然。搢紳多能言之。公之前夫人張氏。早卒。後夫人王氏。封太原郡夫人。七子。伯男居簡。善屬文。顯諸公間。終太子中允。集賢校理。次夷簡。大理評事。季昭簡。太子右贊善大夫。皆早夭。仲從簡。國子博士。遭公喪。不五旬。以號慕卒。嗚呼。公識度過人。幼時。已自不爲豪侈事。後官稍顯。而產利歲狹。仰俸賜。終無所營。居常置酒。與賓客相娛樂。不以屢空爲解。及終。家人待襚。乃能具喪。生平無悔咎。惟一以任人爲負。予嘗謂今之人。如公才能。門閥亦幾何。假令事聲利。則易諸徇務。亟成。少嗇先貲之饒。則富馳驚于親近。則速顯。今反舍所易。趨所難。與夫挈然才。經然辨者。竝處茲世。彼此失得。宜有蹈道者辨之。集二十卷。銘曰。

公之先。蓋世家。顯發祥。公之仕。對盛時。嚼含章。道逶遲。蹇不回。晚乃光。老成人。倬有猷。時而揚。退于家。有生涯。壽則藏。葬何所。從先兆。洛之陽。

賈令公墓誌

公諱注。字宗海。賈氏。自漢梁王傳誼居雒陽。以王術說文帝不合。而爲儒先。捐之諫。元帝罷朱崖。以安關東。人蒙其仁。在魏晉。常爲薦紳聞家。至唐司空魏國公耽。世貫滄州南皮。佐德宗有功。任宰相十三年。爲

長德鉅公子孫稍稍徙真定。五世祖諒仕爲本府掾。棄官去依鹿泉抱犢山。肆然不以外物膠于心。生高祖瑾。仍世隱處。曾祖處士諱初。有至行。守鄉里。不肯事四方。祖諱緯。博學善詞章。論議明銳。一時諸儒皆屈。唐自武宗後。史錄亡散。君掇拾殘餘。爲唐季補錄數十萬言。敍成敗事甚悉。書顯于時。漢周間爲中書舍人。時主以君貴。卽家拜處士爲司封員外郎。不事事。累贈右丞。考諱連。周顯德中擢進士。太祖平蜀。召爲太子左贊善大夫。知陵州。州有鹽井。異時置熬盆。民利其贏。蜀滅。吏塞井亡去。紿言開者不利。太守公私貧虛。食絮無滋。君身負畚鍤。率吏悉發其堙。曰。苟利國。吾死不愛。于是鹽利復興。歲貲數百萬。人皆富完。俄終官下。陵人德之。畫像以祭。遂種其祠。公生三歲而孤。哀慕如有知。長乃自力于學。聲稱發聞。太宗淳化三年。以進士試殿中。及第。調主新建簿。改棣州防禦推官。真宗咸平中。契丹侵河北。引師環城。設攻具。公登埤射其長。殪之。圍解。遷定州觀察推官。敵歲侵邊。官兵留屯。公常護糧及資具輸之壁。敵不能抄。改陳州幕府。公卿以爲才有餘。可任臺省。交牘言。上有詔改著作佐郎。知鳳翔府錄事參軍。未行。病卒。實大中祥符元年夏五月。壽四十有七。公之去中山在京師也。以族來。故不克歸。明年卽葬公于開封府開封縣汴陽鄉之原。賈爲開封著姓。自公始。公于政事精力不懈。善討擿病利。故所治必最。官輒遷。爲人方正。不語怪神。惡剋圓蘧媚者。絕不通。佐定陳二府。其大帥皆副馬右戚。居止貴甚。僚屬之見者。仰而候。俯而趨。獨公正色廷辨是非。帥折節禮之。由是益知名。居家孝。早失兄。躬撫孀鞠孤。無異慈。娶夫人史氏。生

八子成就者三人。長曰昌朝。今爲山南東道節度使。檢校太師。同中書門下平章事。安國公。次曰昌寓。大理評事。夫人操嚴而行危。自罹憂。終身不御綵繡。悉出簪珥。市圖籍以教子。時丞相方幼。夫人勸勸指畫。入俾與賢者居。出俾從仁者游。故年十八能奏頌。天子召試翰林。聲名一日暴天下。今上嗣位。進講禁中。以文章任舍人。以治劇第一守京邑。以勁亮忠厚擢御史中丞。以器無不施參總機務。踰年使樞筦。又明年遂相。茂烈洪勛。充格光明。久之。以武勝節度守北都。破甘陵有功。換節判鄭州。使天下人拭目而觀。曰賢宰相。若夫人。可謂善教子矣。天子誕日。羣臣上千萬歲壽。于時丞相冠百官于外。夫人首命婦于內。人倫之寵。舉之其家。上嘗賜金飾安輿一。就養于魏。丞相年踰五十。奉觴膝下。怡怡有孺子樂。若丞相。可謂善顯親矣。夫人以皇佑二年夏六月丁巳。終鄭州之廨。壽七十九。精爽凝定。將終。徧命諸子內外姻。語訖乃瞑。丞相卽日上節印。且請終喪。上不許。癸酉。制召以冠軍大將軍。左金吾衛上將軍。仍舊官。敦遣視事。丞相哀訴曰。少孤。惟母爲恃。幸時無金革虞。又教愛三年。乃遣使降手詔。褒允。贈賻備厚。方丞相之貴。以恩追贈舍人爲太師。夫人崔氏。栗氏。爲齊燕國太夫人。贊善爲太師中書令。夫人胡氏。晉國太夫人。公十一。贈爲太師尚書令中書令。夫人六封。至安國太夫人。公之葬也。以家多難。故塋迫而儉。至是庀事。乃治而廣之。開阡列樹。用上公之制。甲令也。卽以其年秋八月甲申。舉夫人之喪。合于公墓。丞相自執喪。號踊驚。身侍夫人柩。自鄭還。徒步二百里。不避塗潦。見者爲垂泣。居常枕塊席苦。齟齬爾而劬。縱縱爾而誠。

所謂孝子不匱者昌寓孝謹有君子風。在官稱職。惟公潛德祕猷。可以參國謀。熙王路。而年不中壽。獨令名不足厭也。故涵慶淳祥而大興。惟夫人婦則母儀。春秋承宗祀。身及其榮。獨品桂錫。錙不足厭也。故神明康強。涉毫而臧。凡天之報施。或隱而先。或顯而後。要之若合符然。以爲不信。則視公之烈之詒。夫人之享之遐。丞相所以膺胙受成。果何如哉。銘曰。

賈自中山。世有顯聞。舍人含章。克代帝言。惟時陵州。以死勤民。著作嗣生。親炙先芬。其趾儀儀。其羽振振。才茂行充。不涅不磷。肆其方強。勵業搢紳。胡然弗淑。殲此哲人。惟其不有。是慶後昆。賢嗣光光。顯相大君。憫冊追綬。參漏幽窀。合姓也賢。教子以仁。惟考終命。歸祔斯原。款石藏幽。天壤相泯。

故光祿卿葉府君墓誌銘

慶歷三年歲舍鶉首。秋七月丁丑。光祿卿致仕南陽葉君齊。終于京師。享年八十。其孤翰林學士清臣奉柩自京師歸湖州。卜之得九月庚寅吉。乃克襄窆于烏程縣澄靜鄉吳里之先塋。前此翰林謂僕。與我遊而知我者。莫善于君。君宜爲銘。僕于卿既丈人行。于翰林又第同年。仕同班。雖均鯁共哀。而誼不得辭。遂撫系鋪閱而銘諸壙幽。君年三十。始有仕進意。負策西向。試禮部。辭尤工。及進士高第。調和州歷陽主簿。就改州司寇椽。歷澤州清海軍軍事節度二推官。時州將伎貪。以便文自喜。君臨事。持可不可。中毅外和。以規諗之。歲終。將得無尤。亦不能以事譎君。盜伍持仗劫民牢豬。吏結重辟。君獨謂從二人當上讞。既報。

不死。州將始憾。終謝曰。微從事。吾坐入矣。監司最其課。交任于朝。改祕書省著作佐郎。留爲大理寺詳斷官。未幾。監建安軍榷茶務。移知遂州小溪縣。授永康軍青城令。時大阜江潔澍溢。涌邑守百丈堰。沒不盈版。皆搏手相視。君謁李冰祠。盛服立雨中。邀神爲助。有頃。少霽。水波爲卻。歲饑。君毀家困賑流人。豪太姓聞之。相率助貸。蒙袂數十萬。咸得更生。以檢書丞知光州固始。有孤女擁高貲。病甚困。叔規取其家。陽爲授壻。二夕。女死。君廉得其情。坐叔罪。簿入女財。直鉅百萬。以太常博士通判宣州軍州事。越人訟分財。七劾不承。君被制往按。不旬日而決。果若吏受賕而導其欺。以屯田員外郎通判揚州。民冒鹽權。乾沒不悛。君建弛禁與民。可以省罪均利者。切切數千言。書奏不行。還朝。以都官員外郎通判濠州。歲中。卽授廣南路提點刑獄勸農使。使廢。以司封員外郎判三司開折司。出知宣州。入爲戶部判官。改工部刑部二郎中。又爲蘇州。會水災。農乏食。相與持糲矜強乞丐。吏欲以盜論。君原其窮餓。一皆未遣。人人感愧。汔歲定。不復爲盜。就改越州。以兵部郎中還。判度支勾院。時翰林爲鹽鐵判官。故君移判尙書刑部。銀艾相交。世榮其遷。尋乞爲湖州。州本君再再世所貫。墳墓親戚在焉。到部。釀酒上冢。與鄉人父老相對爲樂。鄉人父老憚君清。亦終不敢謁以私。年耆益厭吏事。上帝願從散秩。有詔以本官分司南京。君卽日還姑蘇。田數十丘。宅百畝。蒔竹林。治果園菜畦。烹雞炮羔。與比隣歲時相問遺。往來南阡北陌中。幅巾氅裘。彷彿造適。里人不謂君經爲二千石。蓋老耄所謂知止不殆者。明年。遷太常少卿。又六年。遂老。事真宗及上。殆終四十

五年。凡階爵皆五品。服三品。勳二品。君名參。字次公。曾王考彪。王考蟻。皆隱居自放。考達嘗爲錢氏霸府從事。不得志。因投檄去。泊終不顯。以君故。累贈刑部侍郎。君少孤。事母羊夫人至孝。異時疾革。君惶遽。剖股肉爲羹。奉夫人食之而愈。夫人亡雖數十年。言必流涕。爲學苦。從人借書。皆手寫。終卽誦。爲吏廉。與人無苞苴之饋。所去民輒思之。爲獄仁。鞠聽纖微。無所隱。然卒多平反。生平居官無毛髮咎譴。專務爲陰德。浚蕃涵淳。以大其源。故翰林乘流席慶。汪洋大肆。惟其有而似之故也。翰林工文章。古今多所貫綜。方正持重。能以材自結于上。知制誥不踰歲。擢龍圖閣直學士。權三司使。以善職職聞。罷知江寧府。復召爲學士。其嘉謀鯁言在臺閣者。士大夫爭稱道之。使志充計行。其光明于世。烏可量已。初。翰林自江寧奉先卿北上。日調甘旨。烝烝承顏。旣而養不待而生有涯。未如痛何。雖然。以鮐背歛牖下。旣闔棺。君子咸曰。善人喪矣。嗚呼。盛哉。娶夫人楊氏。關西之裔。孫柔芳靜淑。爲內外姻表式。先君十三年而終。終而葬。君生平自誌一穴。曰。我終必居此。故翰林遵治命。楊夫人同兆異封。竭信誠奉窆。總總爾皇皇爾。無一物有悔焉。銘曰。

胄出諸梁。邈千禩。後昆推遷籍吳里。三代曠僚君。膺仕。槃根茂葉。叢慶祉。忠愛廉靖府循吏。華顛辭位延壽紀。茂生翰林。復濟美。盡養而收忠孝始。相冢山原古桑梓。嗚呼體魄安于此。

代祠部墓誌銘

君諱淵字蘊之代其氏也本雁門貴姓唐僖宗奔蜀君之先亦逃亂客導江世受田遂爲導江人生知好學性順祥事親孝執煩苦惟謹稍長從隴西李旼授經清河張達爲文章一日聲聞出諸生上愈晦抑年四十未肯仕鄉人更往勸天聖初就進士試禮部最後日帖經卽偃蹇曰不願在選取過所欲四姻友共挽迫內省闔中訖試名在第一甲調清水主簿嘆曰祿不及親吾何賴卽去官還鄉里蜀之才子弟舉從之踵相逮坐席常滿蘊之爲示書精奧教辭賦法度得其道者去爲聞儒顯人于是蘊之名益彰今端明殿學士尙書王公拱辰安撫劍南表爲鳳州團練推官不拜故樞密直學士楊公日嚴未之識薦諸朝拜太子中允遂致仕始謝門下客止不教授深探易性命之理作書二十篇細復而推原之易家取爲雋腴明堂赦改太常丞賜緋魚晚年撤葦腥日一飯巾褐蕭散自放山水間號虛一子樞密太尉田公況治益時厚問以禮盡取其書奏之天子異焉卽家廬拜祠部員外郎蘊之爲人簡潔雖長吏歲時致問無半語誘以私與人交不款曲澹然對之故昧者不得親賢者不得疏久乃見其所合云嘉祐二年秋九月有疾召術家曰爲我擇勝日對曰丙申良蘊之領許卽勅家人具潘浴左右不識謂何是日卒于寢曾祖某祖某考某爲吏有陰德在人母何氏蘊之引恩累贈屯田員外郎永昌君娶夫人趙氏封導江君生四子曰履享履祥履和履中皆以孝秀世其門明年諸子卜冬十二月某日葬通化原從屯田蘊之志也予以蘊之爲同年弟知之也熟又履祥持號略楊冕狀來請銘嗚呼予能言之銘曰

仕不_レ官。隱不_レ達世。藩臣高之。天子褒之。汎然受名。內完秦和。萬物營營。不能舍其情。享年七十有三。考終厥命。是謂其言立不朽之徒歟。奚其爲爲政者歟。

故崇儀使高府君墓誌銘

府君諱審釗。字伯通。其先爲渤海著姓。唐代宗世。河朔再騷。徙貫并州。今爲并州榆次人。君烈考贈左千牛衛率府副率諱諭。性開果。有文武方畧。幅巾見武寧軍節度使王公全斌。異其人。與厚相結。以女妹妻之。旣皆不_レ永。于是君生三歲矣。王公憐其孤。鞠爲己子。因姓王氏。旣壯。涉獵書史。性慷慨。上武力。然出入舅家。以謹孝聞。數計事軍中。又痛折節下士。所交皆賢豪。故王公愛重絕諸子。奏任右班殿直。王公被詔率九將軍伐蜀。君侍行。王公破賊。遂虜之還。爲有司簿詰。王公坐貶。君賞不行。稍還東頭供奉官。王公卽世。心喪無已。表復高氏云。僞漢據并汾。數侵盜邊。詔君領轂騎戍晉潞。又領邢州潞羅八寨。濱帶賊境。閱數歲。甲壽士精。敵人畏之。俄而太宗且將伐河東。君時督先鋒。至則引鈎輞。冒矢石。直薄外譙。流鏃中面。督攻益急。上召還。慰曰。無遽。恐亡吾壯士。由是始知君。賊平。遷洛苑副使。領飛龍院。旋疾暴作。上猶愛其材。特遷崇儀使。賜錢七十萬。使掌衛州三牧龍坊。以子懷誼爲右班殿直。侍醫藥。端拱二年秋九月。卒于官。享年五十有五。君大王父諱偉。王父諱翕。皆以儒名家。夫人扶風縣君馬氏。濮州團練使萬之女。生三子。長懷諒。季未名。皆早卒。惟仲子懷誼終右侍禁。君之喪也。家不堪多難。是以殯于衛。後五十四年。孫天

章閣待制若訥謀新兆于開封府開封縣吹臺鄉建邑村之原克祔二尊焉嗚呼府君才爲時用且大有立而遽病卒似若命然然孔子罕言命亦難言之銘曰

猗崇儀材而力扞邊鎮百夫特被金痍聲震敵病中奪殯久客維三年實慶歷夏六月歷寅直京巽隅龜墨食祔雙靈安兆域

故右侍禁贈左屯衛將軍高府君墓誌銘

府君諱懷謹姓高氏愛之其字也以蔭補殿前承旨性方正孝愛肅給好謀長于治官工執射參刻有法顯考病瘵甚太宗惜焉寵以崇儀使領衛州三牧龍坊且授君右班殿直居家侍疾崇儀之喪泣血盡哀帝識其才臣子俾代父任坊畜戰馬菱穀費不貲君建言覃懷邢趙間多曠野美草西竝太行萊牧所宜願時其出入如著令許之歲減用十八甌飲甘涼閑倍倍孳改右侍禁入主駢驥院以親疾辭劇事願督永濟倉使晨昏焉年三十九以病卒實景德四年君娶閭夫人生一男子若訥字敏之今爲尙書禮部郎中、天章閣待制兼侍讀初君與母夫人繼終閭夫人比遭大憂護幌柳客窵衛下撫幼授遺閒關窮年操潔誼嚴族姻稱仁女歸男立慈訓雙濟故敏之能興孤生入京師以文策進士以材選御史以鯁諤官諫署以淹該直書林雲岡華光以侍以游跡其致者夫人力也于是自上累贈禰室至左屯衛將軍以長安縣爲太夫人湯沐夫人之歿後府君凡三紀實慶歷三年敏之惓然苦中悼厝安之緩泣血奔問則新是

卜得吉繇于開封府開封縣吹臺鄉建邑村之原。以夏六月七日壬寅奉祖妣考妣四喪。叙二窆于塋。遣門人狀先德。諱予爲誌。予與敏之偕第同班。得以敦復世烈而叙之。曾祖齋。生祖贈左千牛衛率府副率諱諭。生崇儀使審釗。高氏自副率以來。根德砥忠。盎然欲有爲。咸屈于促算。屯衛將興之。又不克。故代社家祥。蟠蜿扶輿。敏之受而熾之。爲朝龍光。天之嚮勸不誣哉。銘曰。神理祐仁。弗丁厥身。子克奮興。譜閥大振。追賁卽安。還昭前人。

故大理評事張公墓誌銘

嗚呼。有宋聞人張晦之之墓。晦之名景。江陵公安人。羈尹能長言。嗜學尤力。未冠涉通藝文。頗班班言當世務。貧不治產。往從崇儀使解人柳開。開以文自名。而薦寵士類。一見歡甚。悉出家書畀之。由是屬辭益有法度。開每曰。今日在朝廷挈囊薦笏。誰踰晦之者。卽厚遣使如京師。時富春孫僅。沛國朱嚴。成紀李庶幾。號爲豪英。晦之敝衣與游。名稱籍籍。美不容口。眞聖諒闇。未卽聽政。責有司精覆計偕。預者十二。晦之名在第四。調主大名館陶簿。年少氣銳。未能以智自將。坐公累爲吏痛詆。貶全州。會赦還。豪長者得罪。并坐所知。繼爲房襄二州文學參軍。晦之中廢不用。則大覃思古今。爲洪範王霸二書。常病浮圖氏怪迂誕荒。塔廟日熾。雖服儒衣冠者。皆共寵神之愆。眞六經反爲外典。故因事見文。爲紀傳數十篇而辨析之。雖與世舛馳。而自信不貽云。康肅陳公堯咨。以西臺舍人爲本府。雅聞晦之。爲言于上。復選楚州寶應主

簿最狀應條。監司以聞。改大理評事。知泗州昭信縣。淮島僉雜。馮戾禩巫。晦之剪除房祀。且百所。輸入材瓦。以完吏舍。急病職勞。邑人宜之。轉運使。任其能。移掌真州榷茶務。既又請通理州事。可制已報。會遭疾。終官下。年四十九。實天禧二年三月十日。噫。世之言材而顯善而艾。皆若可信。如晦之終始報享。獨大謬不然者耶。晦之幼喪二親。有終身之戚。方其閒關蓬累。而竭誠盡物。克襄事焉。墓不用甃。既窆。則下土實之。曰。千歲後無爲狐兔宅。不亦善乎。荆人高之。咸曰。張氏有子矣。事崇儀也。崇儀欲以兄子妻之。未歸而亡。又委禽於唐氏。生一子。早夭。晦之卽世。夫人奉柩。以如許昌。將便時來南。以歲之不易。久而去室。康定元年。著作佐郎王儀太初。始得護梳柳。以某月日。祔塋其先塋。從昭穆之圖。成君志也。三代之諱之行。則渤海胡旦及康肅公爲先壙之誌。若表在焉。平生文章。門人萬稱。集爲二十五通。太初與晦之再世中表。重節義然諾。且少相友善。故哀狀丐文而畢此封樹焉。銘曰。

瞻才章兮懿淳孝。至撫仕兮難老。嗇弗予兮孰天道。寒皇皇兮晚獲伸。發吾懷兮露珍。甫半道兮摧華輪。倚廬空兮無冢嗣。從藁殯兮二紀。魂煢煢兮何所止。彼戚友兮義弗違。奉輅柩兮來歸。穴虛祔兮人所悲。兄弟鮮兮疇立後。神茫茫兮安究。尙立言兮參不朽。

景文集卷六十

誌銘

高觀文墓誌銘

至和二年秋八月甲寅。觀文殿學士、兼翰林侍讀學士、尙書左丞、同羣牧制置使高公。薨于京師之第。享年五十有九。旣聞上震悼。趣輦降輅其寢。旣還。明日罷紫宸朝。出尙書右僕射制書告柩。贈幣賻金系于庭。大常攷行。諡曰文莊。以冬十月己酉。克葬公于開封府開封縣褒清鄉之原。前此門人河東裴煜。騰狀來中山。取文誌隧。予與公游也舊。誼不得讓。哭寢門已。次其梗概曰。公諱若訥。字敏之。生十歲而孤。侍母夫人客汲郡。生事日狹。取粗完卽已。惟縱嗜于學。性警銳。過目輒記。自周漢迄茲數千載。救革質文。娓娓能言之。天聖初。以鄉貢牒詣有司。聲光闡焉。一日出諸儒上。方天子委禮部取士。于是中山劉公筠。大哀英才。得二百人。多海內選。公在第四。調彰德節度府推官。改著作佐郎。再遷太常博士。歷三縣。以辨最稱。臺御史薦爲監察裏行。就改主客員外。進殿中。遷右司諫。直史館。起居舍人。留知諫院。換刑部員外郎。知侍御史雜事。于是數見上。言得失。蜀賈援外戚得郎官。知蔡州。公勦賤丈夫乾沒財利。不宜以私謁汙二千石。內侍省大中人怙恩。聲焰震赫。人爭媚附。公斥言其尤。卽日外遷。有詔累黍定尺。檢制樂律。法不合。

爭論連年。公獨以漢世貨泉度寸。定古尺示諸朝。議者服其密。嘗言中書樞密院所與一統類。美風俗。今奏事離立。不改刻遽罷。不能究熟萬幾。宜復古坐而論道。使人自竭。帝聽其言。擢天章閣待制。益親近。轉禮部郎中。出爲河東都轉運使。召還。丁母夫人憂。號訴願盡三年。國朝兩省內外制而上有故者。卒哭輒奪哀。有不獲命。慘袍幘到朝就職。自公得請復。遂著行服。令詔給實俸終喪。逮除盡還舊官。拜龍圖閣直學士。史館修撰。以吏部郎中進諫議大夫。權御史中丞。慶歷七年春。小早上憂甚。引公問洪範雨暘所以致休咎者。公推原五事以對。其議閎深博衍。上嗟嘆之。後三日。引拜公樞密副使。見便坐。上戒以和。公頓首言。和無莫濟者。有如樂焉。音異乃諧。若可否出一。是同也。同則生黨。時大臣執議見選。故公謝及之。由是見謂爲長者。天下無事常宿屯三陲。募兵不止。度支財益絀。公議一切停募。料冗士以蘇調給之殘。詔可。康定時。西鄙騷繹。東南多盜。始置宣毅兵州。悉有之。扞鎮方夏。士旣飽衣食不事。悍不可制。公曰。是本欲制賊。今反自賊。何賴爲。建擇精銳者團籍北遷。以補戍人。守臣爭言士素驕。驟遣必亂。公固謂朝家威令整嚴。等輩孰敢。旣徙。無一士干法。以工部侍郎參知政事。後二歲。由戶部侍郎。檢校太傅。爲樞密使。儂蠻襲邕州。殺守將。公曰。南海可虞也。或謂未然。閱旬。賊剽十餘州。乘流下番禺。入其外郭。南軍不習鬪。部校爭長。連戰輒北。賊遂張。嘯亡命數萬。嶺南大瘡。公謂當遣貴賢將節度諸部。以番落千騎怖之。可禽也。會天臣馳往斬敗。將鼓而南。賊盡銳薄前軍。顧騎出其後。驚以爲神。遂大敗。南事平。帝議策勳。公欲讓功。

臣使得其處卽辭位。章五上。拒不省。公請愈牢。帝重違。又以公次當得宰相。雖解機務。猶以學士籍留自近。公喜曰。天下士不吾責已。公節分崖然。不與俗流。至浮屠神仙陰陽怪譎事。弗語也。在禁中論得失。無少回撓。及建白裁處。皆深自匿。令出。反從人問所以然。故獻納之益。初祕弗得詳。久知乃十一二。常謂承平久。吏忽事。必峻法治之。謂管夷吾韓非責名實。賞信罰必。術最近。與儒家相輔。長利可興云。公之次行軍。約束敕。白罷內降封拜。外戚不可輔政。皆著後法。執官尹不建節。謂貝丘將屈賊自容。卒論死。諫止數赦。蓋畧施行所謂者。輔政七年。潔畏自將。和傳內外。謀議有不盡如素。或蘊諸內。綽然尙有餘。然未嘗以不如素自解。亦不以有餘矜諸人。故仕雖貴。忌者不媚。已去位。間者不容譽。沒而士君子泣相弔也。公善觀書。反復研討。必得其意。乃置。不誕漫莽鹵。貯之胷中。所學遽而該。殆不可及。所著文章二十卷。善文辭者貴之。公累官攝領難悉著。掇其顯者。待制時。假節京西。爲安撫使。在臺兼理檢使。知貢舉。再使契丹。一知審刑院。一領吏部銓。三班院。各再。侍經筵。二。特召進讀者一。爵開國公。階光祿大夫。勳上柱國。邑二千八百。實戶六百。功號自推忠佐理。換推誠保德。大較如此。曾祖諱某。贈累太師。祖諱某。仕爲崇儀使。考某。官右侍禁。竝贈大師。中書令兼尙書令。考封祁國公。曾妣王夫人。祖妣馬夫人。妣閭夫人。啓魏晉秦三國。爲太夫人。公娶太原王氏。封某國夫人。生五男子。曰彥輔。東頭供奉官。曰保衡。曰安石。曰吉甫。大理評事。曰元規。太常太祝。初。公在慶歷時。葬二令君于開封縣之吹臺鄉。地稍庫。公恨之。將改卜。及是。諸孤遷。

二令君樞輿僕射同塋。以昭穆爲位。公志也。凡人見今世傑才卓行。其于奔走嚮服。猶未聞。如古人之賢何歟。不得見而愈貴也。使千歲後視今爲古。予知有藉公風烈者。長想太息。恨不得操鞭箠從公後。以快其慕。爲果不疑。銘曰。

高氏自渤海。徙占河東。爲榆次人。世潛德弗融。久乃發祥。逮公大昌。以孤童奉母。羈旅京輔。軋出陋貧。化爲偉人。由御史諫官。健健敷言。事有固爭。不市直取名。我完吾履。弗援弗倚。一辭寤主。直都貴位。憤俗凌遲。令敝法刊。遂弛必衰。或悼後艱。自公佐王。輔乾爲剛。不假借賞刑。以新故章。引薦俊良。惟力孜孜。斯謀斯猷。外莫聞知。澹于榮寵。峻節是甘。去位甚易。如肩釋擔。邇英之游。惟經術是毗。巷無密輪。奧無媵桂。誰市其門。誰侈而室。聞公之風。可以自律。初秦國多疾。公自調治。方劑天悟。親嚮壽祺。公之屬疾。自診不可治。召見諸子。遺訓愈厲。歿無以私。敢丐諸天子。天子賢之。嗟我師臣。顯卒光哀。滂漏厥恩。予聞于古。曰仁者壽。公不六十。斯言叵究。有宰臯如。有樹岑如。公安是居。千載不渝。

宋府君墓誌銘

余四世祖在晚唐時。以御史中丞失官。始籍雍丘。旣歿。葬總亭下。子孫留不去。益大。列東西南北四院。以昭穆別之。遂爲開封冠姓。入國朝。宦學數十人。比宋之顯者。虞部員外郎諱文蔚。字公炳。治春秋擢第。歷八官七遷。皆以最聞。以大理寺丞爲中江。時狂人乘官吏大集。走呼曰。賊至矣。蜀人喜亂易搖。皆相怖亡。

匿君叱左右縛笞之。以令市人衆不敢動。里閭德之。爲立生祠。以郎守歸州。戊卒謀劫庫兵叛。君先期取之。探治根窟。威振一方。君爲政。緩急方畧類若此。以殿中丞監京師稅院。再歲。羨九萬緡。當賞。忤執政意。不行。亦不自白其勞。爲人綆固慎畏。不通親友餉謝。仕三十年。瞿瞿益修。未嘗對公門免冠謝咎。家無十金產。每一官罷。輒襍被去。甘足貧槁。澹如也。以老得謝。壽七十有二。服五品。勳十二轉。履尙潔完。蓋古所謂善人者耶。仲尼曰。善人吾不得見之矣。如君之亡。世學仲尼者。且恨不得見。況我昆弟宗族間乎。君娶陳馬邢三姓。邢封樂壽縣君。後君十九年終。三子翺、翊、翊。君之老。推恩于翺。得試將作監主簿。累調觀察府推官。有吏才。敏而文。偃蹇寡合。故仕未甚顯。然趣遠行嚴。使有合于時。願必大其宗。翺、翊皆向學。翺侍親。再割肉于股。以愈親疾。鄉人孝之初。故塋狹。無餘位。故翺等更卜臨黃之原。吉。以皇祐二年十一月戊申葬。君及三夫人。北望先隴。六里而嬴。尙成君之志耶。曾祖範。爲內兵主簿。祖翺。爲孝感令。考在恭。爲長州主簿。贈比部郎中。母黨夫人。贈馮翊縣太君。銘曰。

有行而純。有吏而循。我于吾宗。實見其人。秉義知退。以歿元身。安宅鄉塋。永慶後昆。

故吳興居士吳君墓誌銘

昔太伯延州之興。本諸禮讓。流風餘教。染其深迹。後之苗裔。雖在畎畝。咸能整飭。表率雅俗。豈前人之遺烈耶。居士某諱。字子玉。吳興故鄣人。曾大父當錢氏之霸。相與隱晦。然齒于里。皆丈人行也。居士生國初。

建隆間。長則天下甫定。人去湯火。俗識簋豆。常喟然有志于學。振起門業。會閔凶所遘。族大爲諉。急于營卹。已而不果。方事之隙。猶佔簡畢。故于經史。泛通章句。處州黨。持門戶。伏臘支計。內外仰給。鳴鳩之施。莫不均壹。鄉人之善者。服其行。悍者偃其風。飲人專以和。存物先諸惠。故門內外無間言。里中號爲有恩。子曰。施于有政。是亦爲政。斯近之矣。所居美田宅。佳山水。持老子知足之計。常守雌靜。他日子姝十數。當就外傳。自恨官學不究。無所成名。出其家書。付之肄業。立學舍。延儒衣。督勸其勤。常自噢嘆。景祐初。若子若姝。遂登厥科。今位諸朝。如其本心。惠訓使然。居士以慶歷丁亥正月二日卒。初不甚疾。了無怛化。治命歸骨。附于先隴。諸子奉遺意。卜其年九日甲子。葬于某鄉某里。秩于其祖之側。娶沈氏。先居士二十歲而亡。悼及賢和。卒不復娶。子五人。長曰隣幾。次慎幾。早卒。次曰惟幾。次知幾。任大理寺丞。嘗領安仁長。遷秩殿中丞。聞訃。不拜。次曰慮幾。隣幾而降。率端良友悌。保家之令。予曾識寺丞君。端粹開敏。可謂佳器。及銜恤在疚。濱于焦毀。匍匐流涕。來訴窮罰。且言日月之定。託銘諸竊。惟純孝之志。難以辭拒。因約其先行。以表諸後昆。銘曰。

履道之吉。易稱幽人。國風之樂。迺在衡門。十室至細。忠信所存。彼善居士。結髮修身。志便休閒。行成州里。能睦諸婦。善教厥子。起家班朝。光明之始。惠訓則然。積慶宜爾。七十黃髮。啟手歸全。治命有付。葬耐其先。故彰遺里。美哉山川。吳氏有後。存子孫焉。

楊太尉墓誌銘

慶歷二年契丹闖差人來請設言造端謀害先盟南竝盧龍塞陰徂邊隙上方視圖按鎖曰中山博陵襟東空道天下勁兵處須貴重宿將以張吾軍于時河陽三城節度使楊公崇勳守淮陽其三月召還既見上數請問陳方略願先顏行乘北方盛秋有詔仍舊節復拜同中書門下平章事部署真定州兩路馬步軍卽判定州公事至則飭部隊習馳射敕甲休士堅壘養威本法設張伍符叶修由是幹皮鞅幹備于行渠荅羅闔給于守技擊跳盪奮于屯長城巨防隱若萬里其五月移判成德軍兼高陽門都部署于是河北兵皆屬會朝廷以不戰屈敵其秋麾下兵罷十二月改判鄭州前此公告足盤頗害良行當緩急不敢爲解至是以疾自上乞致所事還私門詔授左衛上將軍聽謝明年拜太子太保全食其俸五年後五月己酉薨于清平坊第之正寢享年七十一上聞訃悼痛再不視朝以太尉冊書告于柩內司賓臨問其家錄孤歸賻治命不敢當鴻臚葬有司謚曰恭毅嗚呼逢聖于始顯庸于中奉身于終綴榮于哀其所以載侯表世家者幾何公之比公字寶臣本宏農著姓後子孫有入燕薊者因土斷爲薊人曾王父方道終後唐涿州刺史王父守斌及太祖時爲龍捷指揮使父全美爲太宗倚信終殿前指揮使左班都知比三世皆材當大有爲而不克顯蓋蒔祥播慶逮公而獲歟公貴竝贈太師中書令祖室鄂國公禰室齊國公會王妣寶氏王妣孫氏妣王氏啓楚韓秦三國爲夫人公年十一父任東班承旨眞宗在東宮以夙敏得侍

賜令名且敦勸他日謂左右曰聞若等嗜學吾授若書衆皆頓首謝于是令太子太保致仕張耆爲學長公與故宣徽南院使夏守斌爲學寮餘比諸生以授孝經論語詩賦雜家自是通古兵法書術知前世興亡事甚悉眞宗踐阼累遷內殿崇班由供備庫副使三遷至東入作使國朝翰林司掌湯液果醢之奉乘輿宴羣臣者在殿中尤親近羣牧司領內外國馬時出入而蕃息之是最要劇樞密承旨所以總郡曹署二令地逼勢牽人憚居之銀臺通四方章奏襃積不時上吏易竝緣爲奸公始以尙衣庫使領翰林司供事以辦又爲羣牧都監以西上閣門使爲羣牧副司騶訓以詳以左武衛大將軍恩州刺史充樞密都承旨參穆基命改左驍衛大將軍又提舉樞密院通進銀臺司公事程無留書摺紳由是知公材無不可施毅然有大臣望拭目觀矣俄遷英州防禦使侍衛親軍馬軍都虞侯并代州馬步軍副都部署未行留爲客省使仍防禦使授領三班院皇城司兼閣門四方館事章聖倦勤皇太子參視朝政會用事貴人怙權甚間畏大臣不附欲專樹所私密計諗公公亟道不可彼業已露愈欲脅持公因羸服夜過樞密使第白發其謀明日樞密院以急變聞帝命曹瑋與公收按首謀窮治支黨斬翼獫牙宮隣以安旋授鄧州觀察使牢讓不拜詔但易桂州復轉內客省使兼羣牧使上旣纂承以彰德軍節度觀察留後知陳州歲中卽除殿前都虞侯副眞定路馬步軍部署召爲侍衛親軍馬軍副都指揮使以振武軍節度爲殿前副都指揮使久之換節鎮南軍凡天下拳勇遁悍材官步則拔距蹶張騎則跌後揜前悉集京師日閱而歲擇之

得赫侍衛軍武力之右卓異者升爲殿前軍內參屯廬則巖廊期門出陪營衛則驍騎羽林所以權中制外厭亂萌搃闕亢自候奄而上皆慎將徹侯爲之公之扈寢弋總離衛前後十年爲國爪牙其見信于上如此以職勞改宣徽南院使兼樞密副使明道初寢宮考室以丞相爲修大內使公爲之副授景僉功指期落成天扶神尊萬楹有煥又改節山南東道上與明肅皇太后嘗曰先帝稱楊某忠孝亮直可任大事卽以樞密使印命之公自以得君逢時底裏無所隱晝日萬幾處可于前天子器之號爲稱職歲餘以三城師節兼丞相秩復治于陳仇家上書追寃前坐釋憾于公乃罷丞相印綬徙知壽毫兩州還爲宛丘公爲人方重有感城府開爽論議常傾座中事先帝有雅舊故敢面觸廷諍候人利病及政可否必爲上言之多所開順近臣見時不用兵建言可駕廢馬取贏以濟國公執奏曰當承平時無所事騎然自昔忘戰者危不備者不可以師帝然之由是議格王均亂益州公乘驛受諸將所奏事眞宗再自將幸河北詔公走僂道入屯壁以密旨諭帥臣論功爲多又率兵守澶淵浮橋時邊民之南項背保道公選善游數十工護濟全渡多不可勝計其仁愛根于心寧勉爲哉壽春多高貲大豪囊橐老奸持吏二千石長短公下車擯其無狀逮繫論報隸身徙家窟穴破平治爲東方最善待士不倨貴與游皆長者鉅人屬吏或材言之朝不進不已其不材亦務全安之乏者周窮者振專務飲德不伐嗜唐白居易詩比次後先號白氏編年自爲題辭傳于世七歲時兩足瘳不仁有異僧過門嘆曰奇童也爲出肘後藥傳其處數日趨戲如常家

人具百金爲僧謝。訪之卒不獲。福胙憑厚。蓋若神所相云。凡累食戶萬四千二百。實四千五百。階勳極品。檢校八遷至太尉。爵本郡開國公。功臣。在禁衛時。忠果英勇。推誠宣力。在機近時。推忠協謀。同德守正。佐理守藩。則推誠保德。崇仁忠亮。守正翊戴。數之繁縟。稱是任用。初。公罷常山。親吏得罪監司。深文譴公。故菟裘之還。褒寵未極。久之。直公無罪。遂有儲保之命。方公護諸將。連兵數十萬。壓趙睨燕。幹不庭方。敵人恟疑。虛喝不敢進。其倚任何如。乃今以刀筆曲折。詆欺取勝。吏之文致。誠可畏已。賴上廓度寬仁。卹往厚亡。進退之交。無毛髮可間。聖主之保功臣。自有體哉。公娶三夫人。曰王氏。未及封。姚氏。芮城郡君。田氏。京兆郡夫人。子十二人。宗讓。內藏庫使。宗詡。故右班殿直。宗說。西京作坊副使兼開門通事舍人。宗誨。內殿承制。宗識。故內殿崇班。宗謹。宗誘。內殿崇班。宗誼。東頭供奉官。宗諫。故東頭供奉官。宗詰。東頭供奉官。最幼。早夭。家老洎諸孤。以爲春秋諸侯葬。不過五月。用奔走藏事。以仲秋壬申得吉卜。克葬公于開封府祥符縣鄧公鄉公家原。從齊公塋。穆位。舉三夫人附焉。弗慢而壞。故禮周。必信而誠。故情稱。旣又巧文譏美。孝子之事終焉。銘曰。

太尉之貴。發自孤童。給事儲邸。允顯有庸。天飛雲從。化爲元功。累光疊華。遂都貴官。邇臣遐憾。相軋以權。先事發機。敗踵不旋。乃總營衛。乃建節牙。克冠天樞。肆勤王家。將印相印。于藩有華。遯人搶攘。陰憾侯疆。公在河朔。盡護戎防。上言北誚。潰其肺腸。事寧兵解。公則引年。帝惟念功。式遏儉言。東宮一品。寵靈益宣。

萬有陵岸不朽斯傳。

胡府君墓誌銘

案胡府君名銳

予友安定胡昕以誠信克葬其考妣及狀行與世使來請銘噫孝乎哉加于人一等矣且予視府君丈人行也故不得辭而銘之予爲兒時從先公牛馬走及見與府君游甚勤居常銜盃酒語仁義譽品賢不肖道詩書前言生民病利袞袞繼繼然皆可覆記府君魁岸人也進退安重頗樂易善談笑視襟如表和氣溢焉發于眉宇臨政敏銳如庖操刀雖體髀大輒迎擊則斷少通陽秋三家及旣第七調吏部銓自縣尉止節度府判官所至常用風績聞佐眞定時羣囚結大辟府君適從外還隨其冤尋與府中執爭已而果不死寇丞相萊公張丞相鄧公數稱其材按部使者見之必加禮退心任其能言于朝然卒不得踐丹塗澤魚班近天子之光老爲諸侯上介傳曰樂只君子福祿申之如府君可謂君子者何其福祿不申耶昕爲光祿寺丞開府兵曹參軍余之女弟實歸之抱瑜襲璫有待而發子三人仲弓叔倫季康皆粹秀韶警鸞鵲驥子蓋府君之德其收報者在子若孫歟初瀛州府君旣倦游居無定貫故三代未葬昕也奔問諸卜得汝州郟城縣鈞臺鄉之原最吉又卜甲申歲秋九月庚申亦最吉則自曾門而下穴位有差終前人之志舉三夫人合于府君之墓予辱于府君游舊矣其才且劭得周知之故銘于埏銘曰

可必者我。不必者天。志與運違。固有以然。沒于己巳。葬于甲申。有穆有昭。相望于原。吁嗟若人。賂後以仁。孝子令孫。祀以永存。

皇姪孫右衛率府率夫人錢氏墓誌銘

夫人姓錢氏。系出彭城。曾祖諱延正。以武力奮爲左金吾衛將軍。祖諱守榮。以謹敏進終內園使。考諱允德。材裕世濟。止內殿崇班。慶祥下鍾。爲令男。爲賢女。果不誣已。惟夫人生而恂淑。幼而純靜。德容充裕。內親黨間。推之善女。工剪製之事。頗留心毫翰。洞曉音律。絲門閤之懿。預藩房之選。景祐丙子仲秋。歸于率府世昌郎吳豔王之曾孫也。人對中禁。錫以冠帔。以藩戚信厚。而永其輔佐。以族系高顯。而承其祭祀。家道甚肥。閨範甚修。使率府有令譽。綽綽公族間。抑夫人之助歟。慶歷元年十二月十三日。感疾而終。一男曰令襄。太子右率府副率。在涪灘孟夏癸卯。葬于河南府永安塋。禮也。嗚呼。夫人始于髫髻。忘慢戲之容。逮于笄總。致雍和之美。歸于邸第。杜驕盈之色。以夫人之淑範。不可以不識。是以追琢介石。納諸壙云。銘曰。

於穆夫人。令儀溫溫。嬪于密戚。生此德門。履道以謙。處貴以約。遠歎藏舟。靡聞勿樂。楚挽酸咽。虞歌涕洟。脩短奄忽。逝者如斯。崇岡美楨。厚窀幽泉。淑柔之譽。垂厥永年。

慶歷元年翰林學士太原王拱辰以著令白于朝得隴西郡追君其母李氏夫人明年以丙寅制書改陳留郡又明年翰林授右諫議大夫權御史中丞歲次甲申卜兆于開封府尉氏縣蔣成鄉之原秋九月庚申奉夫人柩合諸王考贈尙書兵部員外郎府君之葬李氏自成紀來山東世牒湮放夫人之先更爲開封府陳留人數世隱居母曰時夫人夫人性靜淑不媚刻德肖行嚴舉有儀矧事時夫人也以孝稱歸兵部也以順稱兵部故大家尊貴姻婭數十姓愛恤饋餉歲時無虛夫人以恩意接之親疎咸有節適皆喜曰婦當得此春秋烝薦必自執其勞肴潔于筵酒香于壘禮以順迪無神恫戚兵部晚節官不進貲產益空夫人謹視用度均一甘苦兵部以清白聞由是待夫人始終如賓授諸子孝經古詩方田之數逮其就學皆未勞而習教諸婦以箴說盟總臚甲之事俾之居室皆弗違而婉少悟佛諦多薰戒誦經率一月常十齋前夫人趙氏有一女夫人咻愛等已生至女不自意爲前夫人子生十男二女中丞卽第八子天聖八年與多士試于廷天子擢爲第一于是搢紳之言榮且慶者舉歸夫人或祭酒祝延爲夫人壽方將裂脂田資榆章盛茵鼎之養借山河之老子堂侍壽母婦闔庇賢姑九年遭疾不瘳壽止五十三後二年兵部又卽世中丞旣畢喪則自書殿入詞垣躋玉堂數進見言天下事幅臆感慨朝咨其忠議可計行其道光明諸昆躋仕綏纓交照然而其心恍焉悼報之弗逮終天之亟也惟斯文叙實可圖不朽中丞乃泣狀先懿授子爲銘前此歐陽永叔識兵部之埏其言世德備矣故予敘夫人內也畧而行也詳所以申足其

辭以慰棘心霜露之歎云。

誰如夫人有子皆才兮。誰如中丞方顯而養兮。吾親不待鍾于永懷兮。大郡疏封上施窀穸兮。蓬池之西。隧而及泉兮。雙靈同穴。安斯萬年兮。

故贈太師章公夫人追封鄧國太夫人張氏墓誌銘

夫人張氏。自遠祖去清河適南服。歷世土斷。爲建州建安著姓。大父諱元吉。遭閩土僭霸。以鄉里士望被私署。烈考諱仁肅。事南唐李氏。累遷至檢校水部員外郎。夫人卽水部之長女。生而殊稟。幼而明悟。旣笄而四德備。未結縭而六姻是式。武寧章府君諱奐。稔譽柔嫺。合姓焉。夫人移其孝以安舅姑。移其友以和娣姒。勤身以助宗事。盡愛以綏族屬。合幽嫻靜婉之操。以輔佐君子。席慶靈光厚之烈。以克生良嗣。故府君繇鄉彥請舉。揚聲俊域。一子。今戶部侍郎同中書門下平章事得象。以民宗碩望。顯相王室。雖章氏之興。理非一緒。而刑家由臬之訓。實夫人是基。丞相七歲。弄翰闢。諧辭律。十二。衣逢掖。與家尊聯名貢牒。備鋒國器。場中震動。當時父子俱冠汝南之品。先君無祿早世。夫人茹未亡之痛。教忠勉學。更緊慈壺。咸平中。丞相由進士高第。褰巾服政。發舒賢業。寢華朝絳。綢繆二紀。代極言訪對之遇。流根滲澤。在亡均寵。繇是禰室累追贈至尙書左丞。夫人自南陽縣累易封至永嘉郡太君。丞相在禁林。年踰知命。夫人華髮康豫。含飴弄孫。累茵高堂。享滑甘顏色之養。深慈篤孝。相爲慶祉。湯沐榮衍。朝倫聳慕。若其咨訓圖史。審音

徵越。組紉箴繡之細。鮮臚菴涪之法。莫不造詣精極。垂爲家範。雅喜賓集。每子舍盍簪置酒。必躬飭幃御。盡籩羞豆實之品。調烹爇切。畢景無倦。早探釋部。居常薰祓。高情了識。絕死生之怖。明道壬申歲春二月辛酉。以壽終于京師里第。春秋八十。順機趨寂。舉無怛化。旋殯于薦嚴佛寺。後五年。丞相由翰林學士承旨同知樞密院。又一歲。升變槐路。俄服華袞。從陽郊之報。是三者。天子皆詔有司。以隆名極品。寵靈先服。左丞由太保太傅。遂至帝師。永嘉自安平郡進。疏榮國鄧國。竝爲太夫人。初。先公歸全。卽葬本郡。夫人實有治命曰。魂氣無不之也。奚必同穴而謂之歸耶。丞相永懷緒音。昊天罔極。虔詢蓍蔡。始得許州陽翟之三封原。惟吉卜。又得寶元己卯孟冬之乙酉辰。與姓合。乃備厥車靈輅。奉尊柩于新城。從吉道也。丞相以任國之重。不得申私恩。謁常告題旌之引。乃服緦經。哭祖于都門之外。遂勅家丞宗老相仲子約之。以克終襄事。大懼聖善之懿。弗永于將來。有命論次。以期陵谷。銘曰。懿懿鄧國。惟嬪之則。配賢生才。雙我皇極。基母德兮。帝欽四鄰。錫命顯親。重封象服。恤典明縉。成于仁兮。合葬非古。先音有緒。穎曲輔邦。鈞臺故里。安吉所兮。

南陽郡君李氏墓誌銘

夫人姓李氏。系出隴西。太子右贊善大夫惟良之女。武勝軍節度使英國公至之孫。叢光累祥。克誕令淑。家人嗃厲之法。女功織紉之事。耳濡目染。有如天成。旣笄。今左千牛衛大將軍宗立。委禽焉。二姓纓歎。三

商有行。于是奉烝嘗焉。以恭接姆。姒焉以和。鳴鳩一其仁。采蘋謹其職。以將軍之貴。詔拜南陽郡君。方賦脂田。膺象服。飾魚軒之華佖。照玉珈之煌煌。降疾無瘳。享年三十有四。以慶歷三年七月。殯奉先僧舍。明年夏四月。鴻臚奉詔。將柩而西。癸卯。克葬河南永安之西原。子四人。仲舒、仲琳、仲晚、仲偲。竝太子右內率府副率。嗚呼。老宜偕而將軍悼之。慈可恃而率府喪之。天之弗庸。悲夫。銘曰。

永照西園圖厥域。史臣作銘鏤幽石。魂兮有知此惟宅。

景文集卷六十一

行狀

李郡王行狀

李用和字審禮年六十三郡王本隴西冠姓世系數徙邢公自餘杭北還遂籍祥符爲土著王卽章懿皇后母弟性審謹慥慥自將少爲魏王彭城劉美所識且與王有裏表故任爲三班奉職試劇有能三遷右侍禁俄兼閣門祇候爲開封府考城縣兵馬都監明道元年章懿皇后崩詔王會喪京師已葬轉禮賓副使俄持節勞賜西平王德明奉使有指是歲大營宮室王分護塗填宮城遷正使兼領皇城司明年改葬懿后詔王佐經總哀恪誠盡故陵地卑不能無沮洳上怒有司謀始不謹欲薄責其由命王按視王畏得罪者衆委曲申理由是稍解主者皆釋不誅九月改崇儀使兼賀州刺史領介兵千騎護梓宮而西上嘉王之勤錫慰係道十月復土明年二月詔王乘傳行后陵還拜寧州刺史是冬改澤州團練使四年進慶州防禦使歲中爲鄜州觀察使竝仍皇城司王有風力部分嚴整其條約典舊無一日不討于官帝益親任之寶元二年以觀察印充殿前都虞侯又兼鄜延路駐泊馬步軍副都部署未行加拜永清軍節度觀察留後其秋換眞定府定州路副部署八月赴屯王下車曉勅軍伍習戰陣扶惰勉勤營和士威又悉所

賜具饔餼。日月享宴。訖無留貲。明年。擢侍衛親軍副都指揮使。更爲兵馬都部署。十二月。召還。慶歷元年。徙帥馬軍。明年。拜建武軍節度。進領殿前副都指揮使。此三帥府。分提天下兵。以衛天子。鎮方夏者。居則持鉞杖侍楯下。出則導乘輿夾馳離衛具。所以親近倚愛莫二。王徧歷之。出入六年。不懈而虔。未嘗有過。後因請見。自陳多病。願解近職。還私門。上亦以王戚最尊。且春秋高。宜見優禮。不當猶以職事嬰之。乃以建武節檢校太傅。進爲宣徽北院使。逾月。改彰德軍節度。同中書門下平章事。不欲王遠去。故留爲景靈官使。王旣位顯。務閒。常闔門移告。八年十月。上親臨問。賜銀五千兩。王頓首讓。不許。月餘。有瘳。勉入謁。十一月。進檢校太尉兼侍中。仍彰德節度。王小心簡素。雖以元舅之重。在百官諸侯上。未嘗招賓客爲赫赫聲勢。有所薦引。皆長厚知名士。不殖資產。不侈居廡。膳不重肴。室無焯龜。廩無粟駒。四方餉遺。一不納。在朝廷兢兢。入私門申申。雖子弟皆奉承修飭。恥爲執袴近習事。初。王未有第。上以芳林園假之。王固辭。不敢處。乃假今第。景祐中。天子再郊。皆爲大內居守。其見信于上如此。皇祐二年秋七月。疾革。乘輿卽見臥內。王治家素不爲後計。上哀之。賜銀三千兩。以所居長爲王第。斥官邸無慮數千萬。直俾之。得永收其入。二子一孫未仕者。悉給廩錢。中子西上。開門副使。珣。上嘗許爲開門使。至是。拜牀下。欲王及見之。甲辰。薨。上卽日臨弔。爲慟。賻贈加等。以太師中書令隴西郡王制書告于柩。特詔罷五日朝。發哀苑次。王諸子中。璋。珣。瑋。先顯。璋爲神龍衛四廂都指揮使。眉州防禦使。瑋。選尙福康公主。主待年。前拜爲濱州刺史。駙

馬都尉皆忠力靜畏。雖微蔭籍。猶能以才自奮于時也。自古外家負責近。出入禁省。非縱聲險謁。卽貪墨不終。故嬰蚡以通輕俠亡。陰竇以奢狀敗。若郡王據肺腑之地。可以市權。可以干恩。否則狗馬射獵。鐘鼓女伎。以窮玩好。今乃畏漸防微。反若韋布儒者。無秋毫之咎。撓朝廷法。可謂外戚之賢家。三事之哲老歟。詩稱令終者。善其終也。若王非耶。今葬有日。史臣被詔次王行實。敢告有司。請循諡法。謹狀。

孫僕射行狀

孫爽字宗古。年七十二歲。公之先本樂安望姓。後子孫有徙占博平者。墳墓託焉。遂爲博平人。公幼好書術。不事產利。夙儒大原王微以五經教授。其徒數百人。公往從之游。及微卒。有從公質正謬惑者。公厚謝未答。久之。爲言其意義據深切。人人厭服。于是微門下生悉從公以終業。故其鄉之粹然仁者愛之。其里之劃然暴者畏之。會州將少文。憎忌儒服。公不見禮。遷至汶上。樂其風土。遂貫籍焉。頃之。吏上計文。卽偕西遣。端拱二年。擢九經高第。釋褐主莒縣之簿。代還。上言願以本經試最。有司言學有師法。于是以廷尉平直太學爲講員。太宗幸上庠。詔說尙書說命三篇。勛容稱善。且嘆曰。天以良弼寶商。朕顧不得若人耶。因賜公緋衣銀魚。用是明年切免大丞相以郊禮。及眞宗嗣位。再除至殿中丞。又侍講于諸侯王邸。賜三品服。會丁內憂。敦譬還職。是正七經義疏。以勞再遷尙書屯田員外。他日。帝命執政諭公曰。朕悉爾懿行。今欲改任他官。具以情上。公卽對。君行制。臣行義。量能授官。君也。食焉罔避。臣也。又敢擇官以好王誅。對

奏天子納焉。罷宮職。以都官判太常禮院。國子監司農寺。先是五郊從祀。神無席。尊無罍。七廟時饗。獻神
嘏福互用一散尊。豆無三甑。登歌不以雍徹。冬至攝祀上帝。外陔止十七祠。饗先農乃在祈穀之前。釋菜
不備三獻。公建言。獨恭不裕。專非則薄。卹祀媚神。稱而後宜。有詔從焉。自是器備樂完。天壇醕食六百八
十有九。祀農更用辛後吉亥。國學獻事不攝祠官。重矣。與諸儒分集冊府元龜。帝將東巡狩。攬瑞命。建元
封。命公乘驛至塞下。諭契丹所以告成之意。俄假節以金紫。卽王庭賜其君長。廟飲策勳。敘轉職方。帝察
公守正持重。小心謹密。練達光明。才任公卿。明年除工部郎中。充龍圖閣待制。判登聞鼓院。以汾陰。詔書
改兵部。始封瘞二禮希闊。于代刺取屬圖。公皆參焉。尋介岱帝奉冊使還。與文元晁公等同主貢條。又知
通進銀臺司門下封駁事。兼三班院。時真宗已封禪。則西至葵上。明接萬靈于殊庭。大抵名山神靈之封
皆望幸矣。六年。遂下詔用開元故事。款瀨鄉奉太清之祠。公上疏引唐明皇以爲言。天子雖喜其意。然謂
稽古擇善。何常之執。更爲解疑論以示羣臣。始尙書公年耆德茂。重去鄉梓。公至是。上言不勝父子之情。
願歸田里。盡溫清之報。詔不許。又奏願守一郡。以便瞻省。制可之。乃守高密。居部二年。拜左諫議大夫。罷
待制之職。還臺糾察在京刑獄。祥符之降也。始名天慶。先天降聖。爲盛節。詔天下飭齋合燕。費且不貲。公
建言宜罷。以省浮用。書奏不報。未幾。出知河陽。天禧末。縣官度用財力。稍稍減郡國祠醮。終如公言。郊祀
恩。改給事中。公連年自表。以尙書公年九十。按禮家不從政。據令。許解官待養。帝覽奏歎息。詔丞相府曰。

孫某或請急過家及欲近郡則聽之乃就徙兗州明年改元乾興眞宗之後元也其三月今上卽位例遷工部侍郎八月驛召公還拜翰林侍講學士俄知審官院仍判國子監復知通進封駁事兼羣牧使會修先朝實錄以公有胥臣多聞羊舌肸春秋之習命參其典領尙書公寢病也朝廷知公孝特許乘傳視疾再宿至汶上實錄成就遷刑部及尙書公齊終公號慕耀毀尋詔奪服公固願終喪上命貴臣敦諭公不得已還都復舊官頃之兼判太常寺及禮院再知審官院以久次授兵部權吏部流內銓又兼龍圖閣學士賀茶轉貨法久而敝計臣欲撻囊橐權浮淫實緊參定以興長利初公之勸講也不避亂亡臨文未始爲諱有可以規益順諷者必諄諄爲上言之掇五經之切治道者爲經典徵言五十卷奏御繪無逸篇爲圖願置使坐爲位空觀省之助時母闋輔政五日一御事公因言古之帝王朝朝暮夕未有曠日不朝者也陛下春秋鼎盛宜日御前殿見羣臣發揚健粹覽照治本而上方奉養長樂故謙讓未遑也于是公年七十因請間祈致所事上章者三皇帝與莊獻太后特御承明殿存諭數四公頓首且言勸導無狀以暮日希遠途恐不能自還無以塞責乞全首領爲陛下之賜因泣數行下上亦惻然猶詔公與今龍圖閣學士馮元講老子三章又命令禮部尙書晏公殊讀唐史是日各賜帛二百匹後數日制詔報公果不得謝更求近郡上乃從焉改工部尙書以本職復爲兗州且命須小會畢乃得辭待禮復數月請行數矣乃晏于大清樓樂闌上出御飛白書宰府樞臣大字軸各一學士以下小字軸各二惟公與文元大小兼賜

焉。朝廷榮之。竝詔賦詩述所以優待師臣之意。明日詣承明謝。且陳將奉違帷幄。上亟命取老子講如前章。既罷。仍有具衣釘帶材馬之錫。及治行也。又宴瑞聖園。就賜御製詩一章。復詔近臣爲詩以餞。議者謂漢疏受、桓榮、赫烜寵光不克過之。明年耕藉。改禮部公爲政多惠利。嘗奏復濟瀆故道。漂其鍾水。濟鄆之田。微公其魚所至興儒學教導。不純用法律。有足大者。事皆責丞史掾屬。總綱目而已。人皆宜之。不見爲治之迹。明年以病自乞。上知不可奪。乃聽。遷太子少傅歸老。夏五月疾篤。戊子移居正寢。命子孫曰。明日禺中吾當逝矣。且吾在仕途四十年。訖無悔尤。乃今奉遺體終牖下。君子其以我爲知命。口占遺奏。正不以家事爲言。又謂子瑜曰。逮吾屬續。當無內姬妾。獨若與孫在。庶不死于婦人之手。己丑如期而薨。計聞天子廢朝震悼。以左僕射策書驛告其第。延其賞于子及孫二人焉。贈贈稱之士之仁且賢者。莫不相弔。徽數令名。洎終竝榮。夫人天水趙氏。以平原郡追啓湯沐。三子曰瑤。仕歷司虞。止員外。曰琪。止衛尉丞。曰瑜。今爲殿中丞。公于學無不該總。精力彊記。絕人遠甚。以爲禮莫大于祭。故受詔次宋興以來郊廟容典。爲崇禮錄。祭莫尊于天。故本其六名。實則一帝。是康成排王肅。彷彿千載。貫諸儒之論。爲南郊奏樂莫盛于雅。故哀羽萬同律。爲樂記圖。孝莫重乎喪。故援古塞違。爲五服制度。五經之學。章句數十萬。後生佔畢厭苦其說。故作五經節解。刪去盈辭。又請以劉昭後漢志裨范史之闕。尙書釋古文以檢攷今文。謂孟子附聖立書。莊周根道德之論。律有學科。宜竝刊布。又同定論語爾雅義疏。皆鏤槧垂久。唐明皇刪定月令。

自竄新意其事淺而不篤。公乞復康成舊註。還其篇次。議雖中格。禮家諱之。在內閣也。真宗賜歌詩俾之。次韻。公屢辭不聽。乃有廣載集。資質詳審。進止如有尺寸。無僂言遽色。接誘士類。侃侃如也。或以奇袤悅之。則玉色山立。不得而撓。然志尙隱約。器服塵素。不徼福于神。不愧辭于人。善推己以恕物。不格物以己長。讓夷損怨。稱爲長者。尙書公之疾革也。公舐潔其面。以代頽御。未始就子舍。褫衣帶。養者以爲難。安車之還也。日延鄉老道舊爲樂。先時。邑子或從公家宰貸息錢。濟劑券紛紜。酒酣。公命折而焚之。凡散數百萬。其推轂士。不進不止。成就諸儒甚衆。而馮公元諫議大夫孔公道輔先顯。公爲內閣。馮甫從初命入太學。不十年。抗茵憑侍金華。與公同列云。至于日月獻納。便宜施行者。存于有司。伏青規。祕阜囊。則詭辭焚棄外無知者。嗚呼。公有黃中通理之才。服勞累聖。發舒事業。旣光大矣。第不登三事。善九德。寧天裔。公蘊而不使盡耶。將人匱公。賜而弗及庇耶。知與不知。咸爲公恨。卜竊有日。節惠茲在。敢摭雅行。告于有司。謹狀。

楊太尉行狀

楊崇勳字寶臣。年七十。公之曾高。燕薊人也。家習武經。世封勇爵。暨先正令公。事太宗皇帝。親信甚篤。謹幹見稱。濟美流芳。至公而盛。公氣貌溫偉。志懷沈毅。由弱齡而遇主。逮晚節而還政。休有令聞。譜牒存焉。公年十一。以父故。補東班承旨。時真宗皇帝方居潛邸。須忠實聰悟者以充左右。公與李永力同。日中選。

特賜今諱。至道三年三月，太宗上僊，眞皇繼極，公授右侍禁。咸平元年二月，改西頭供奉官。七月，充寄班祇候。三年春，均寇乘間，益部罹患，命公馳傳被受公事。四年正月，賊平，授內殿崇班、銀青光祿大夫、檢校國子祭酒、兼御史大夫、騎都尉。五年，加檢校右散騎常侍，封王城縣開國男，食邑三百戶。景德元年八月，授供備庫副使。二年冬，加檢校左散騎常侍，進封開國子。十二月，授香藥庫使。四年春，駕幸西洛，恭款諸陵，命公爲行宮四面同巡檢。大中祥符元年正月，進封宏農郡開國侯，食邑五百戶。十二月，升功日觀，熙事旣成，授東八作使，加食邑三百戶。三年，順祀蒲中，精禋臚上，回鑾衛闕，推恩綿宇，授尙衣庫使，差勾當翰林司。六年，天子按蹕渦曲，恭款道宗，又命公爲行宮四面巡檢。七年六月，充羣牧都監。十二月，授西上閣門使、羣牧副使。天禧元年二月，旅款羣眞，對越世廟，嚴祀云畢，恩章載舉，加檢校工部尙書、上輕車都尉、食邑三百戶。十月，授依前檢校工部尙書、左武衛大將軍，使持節恩州諸軍事，恩州刺史，充樞密都承旨、兼羣牧副使，尋差提舉點檢樞密院通進銀臺司公事。且國家設鴻樞銀臺之司，素稱繁軼，自公之兼幹也，日無留事。時稱得人。三年十二月，授檢校刑部尙書、左驍衛大將軍、上柱國，食邑三百戶。四年二月，授英州防禦使，充侍衛親軍馬軍都虞侯，并代州管内馬步軍副都部署。卽日改授客省使，依前英州防禦使兼羣牧副使，勾當三班院皇城司，兼管勾閣門四方館公事。眞宗皇帝初以兵寄之重，無甚并代，公旣受帝命，以潛邸心膂之臣，公實一二焉。故左右侍對，必藉其良。卽日故有典客之拜。庶令日侍軒陛，用

爲腹心時今上方正重明之位實居繼照之盛有皇城司聯事者周懷政竊搆邪黨將危大寶陰謀已成
兇言遽露公盡忠是務密疏其由逆豎就擒禁闥不擾非先帝知公之忠厚置公于左右則何以得兇悖
彰敗宗社延永故獎詔溫密增秩優隆八月以功授鄧州管內觀察使金紫光祿大夫檢校司空使持節
鄧州諸軍事鄧州刺史兼御史大夫上柱國宏農郡開國公食邑二千八百戶公屢陳讓奏冀寢恩章尋
改桂州觀察使充內客省使兼羣牧使乾興元年加食邑七百戶會上出震居尊慶澤流布加檢校司徒
彰德軍節度觀察留後食邑五百戶食實封二百戶三月差知陳州軍州兼管內堤堰橋道勸農使十二
月除殿前都虞侯充眞定府眞州等路馬步軍都部署天聖二年二月敕差權定州軍州事二月召還授
侍衛親軍馬軍副都指揮使加食邑五百戶食實封二百戶三年十月授殿前都指揮使振武軍節度勝
州觀察處置等使加食邑七百戶食實封二百戶十一月加食邑五百戶食實封二百戶賜忠果雄勇功
臣五年十二月侍祠圓丘迺輿廣內加食邑七百戶食實封三百戶加忠果雄勇宣力功臣七年九月加
檢校太保充鎮南軍節度洪州管內觀察處置等使依舊殿前副都指揮使加食邑七百戶食實封二百
戶八年十二月加食邑七百戶食實封三百戶加忠果雄勇推誠宣力功臣十年八月授宣徽南院使兼
樞密副使定武軍節度定州管內觀察處置等使加食邑七百戶食實封三百戶改賜推忠協謀同德佐
理功臣蓋公之總禁旅也前後十稔軍政日新宸眷彌渥朝議惟允迺有是拜以旌其能是月命公充修

嘗大內副使、公督茲大役、曾不愆素、落成之日、賞典遂舉。明道元年十一月、授檢校太尉、山南東道節度襄陽管內觀察處置等使、依前宣徽南院使兼樞密副使、加食邑七百戶、食實封三百戶、賜推忠協謀同德守正佐理功臣、公籙前曲謝、莊獻皇太后諭以先帝言楊崇勳忠直堪于大用、十二月、授樞密使、二年正月、加光祿大夫、食邑一千戶、食實封四百戶、十月、授同中書門下平章事、充河陽三城節度孟州管內觀察處置等使、判陳州軍州、兼管內堤堰橋道勸農使、加食邑五百戶、食實封二百戶、賜推誠保德崇仁忠亮翊戴功臣、景祐元年八月、罷中書門下平章事、依前河陽三城節度使知壽州、以懷政仲弟累陳雪奏故也、二年十一月、加特進、食邑七百戶、食實封三百戶、十二月、移知亳州、蕃錫之目、倍越常鈞、仍給帑金以增公費、五年四月、移知陳州、時元昊大爲邊梗、公屢貢囊封、罄陳方略、上以公先朝心膂、多所采納、以手詔嘉獎、練將之盛、實有力焉、寶元元年十二月、加開府儀同三司、食邑七百戶、食實封三百戶、慶歷元年十二月、加食邑七百戶、食實封三百戶、賜推誠保德崇仁忠亮守正翊戴功臣、二年三月、上以夏寇未息、朔人頗駭、敵衆恃強、凌違誓約、驛詔歸闕、召對之日、上曰、以卿諸練師律、素推威望、付以兵寄、屬于老成、迺授公同中書門下平章事、依前河陽三城節度使、判定州、兼眞定府定州等路駐泊馬步軍都部署、下車之日、朔人聿寧、講練周嚴、器甲精設、北鄙傳聞、族衆驚懼、十二月、以諸羌納款、二邊徹警、移判鄭州、公夙有末疾、艱于起居、因抗疏引年、乞骸歸第、上優詔從之、三年五月、授依前檢校太尉、左衛上將軍、

致仕四年十二月加食邑七百戶。食實封三百戶。改太子太保致仕。以五年閏五月二十四日疾終于清平坊之私第。上聞訃惻悼。亟還中貴人監護葬事。諸孤以公當屬纊之辰有厚葬之戒。由是泣懇獲寢其命。翌日遣內司賓至第恤問。厚加賻賜。特輟視朝二日。仍贈太尉。某月某日葬于祥符縣鄧公鄉公家原。祔于先塋。公凡三娶。始嫡夫人王氏。次娶夫人姚氏。次娶夫人田氏。皆先公而亡。男十二人。長宗讓。崇儀使。次宗詡。右班殿直。早亡。次宗說。閣門通事舍人。次宗誨。內殿承制。次宗識。內殿崇班。早亡。次宗謹。內殿崇班。次宗諤。東頭供奉官。次宗諤。東頭供奉官。早亡。次宗詰。東頭供奉官。次未名而夭。公凡五加功臣。至推誠保德崇仁忠亮守正翊戴。系階至開府儀同三司。勳至上柱國。爵至開國公。食邑一萬四千二百戶。食實封四千五百戶。公才謀周遠。器識宏敏。生而羈孤。幼而惠悟。嘗私嘆曰。若目不識字。手不解書。至于成立。何顏自處。由此勵志向學。勤求師友。一日公與張侍中耆輩侍立次。眞宗皇帝謂曰。知汝等好學文字。若能如此。吾當親爲教授。公等對曰。實有志矣。乃謝于庭下。自茲命張侍中爲學長。張景宗觀察爲副學長。公與夏太尉守贊爲學寮。安國練守中而下爲學生矣。帝授以孝經論語詩賦。又教以虞世南字法。公自此旁通經史。周知輶略。附雲龍之會。親日月之光。備四方之驅策。受四聖之簡注。戎夷之納款也。則七命爲館伴副使。郊祀之展采也。則屢擢爲行宮巡檢。其或風聞利病。時政闕失。莫不便殿請封。論列移晷。故相國王沂公。呂許公。深相器重。公六藝之學。射御尤精。每信

使通歡射圃錫宴。上必命公陪。其引滿中的。邊庭歎伏。至今稱之。公秉馬政之年。會有上言者。願以廢駟市取其直以資國困。宰弼將從其說。公耳聞矣。心畫素周。獨于當宁之前語以忘戰之理。帝深稱賞其言。遂寢其不畏彊禦。面折廷諍。率多如此。咸平景德中。敵騎南牧。宸輿北征。常委公傳令邊帥。協謀禦寇。公乃戴星將命。間道徒步。達于諸壘。諭以機事。涉茲危阻。人推其功。又命公固守澶淵鉅梁。時朔方之民。攜老扶幼。晝夜南渡。恐在其後。公繇是求善涉者數十輩。預防其溺。迺有墜河流而得拯者。不可勝紀。公七歲時。已失姑妣。伯氏撫鞠。而得其所。無何。腰足中寒。以至不舉。雖勤詢醫劑。且久而罔驗。一旦有高僧自至其家。迺目公曰。斯奇童也。而有斯疾也。于懷中出圭角之藥。傅之苦所。涉數日間。公蹶然下榻。趨走如昨。後訪其僧。了不可得。故公喜蓄方書。用施湯劑。垂死之疾。獲生者衆。部下官屬有亡歿者。公悉以俸金備其襄事。孤遺還鄉。道塗獲濟。其行陰惠也。又如斯。公家有藏書。積萬餘卷。修職之外。研味忘倦。尤嗜白翰林集。公因詮次樂天自未三十歲至七十五所著歌詩。凡八十一篇。目之曰白氏編年集。公自製序。手寫其集。傳諸好事。公凡歷四鎮。所至之邦。祇率教條。勤訪民隱。壽春富庶。號爲難理。有積年狡訟。前後不斷。公躬加裁決。共稱平允。曹事清簡。吏民宜之。公寬中而多恕。在貴而能降。言不妄發。談必諧理。奉身以約。撫族以睦。親屬孤露。必加周恤。朋執故舊。不忘平生。歷事三朝。踐揚二府。名遂身退。善始令終。若匪負不世之才。遇非常之主。明誠事國。純仁保位。其孰能至於此乎。方就遠而從吉。宜攷行而易名。敢述令猷。

用資清議謹狀

石少師行狀

公諱中立字表臣年十三居僕射喪毀而慕僕射有功于太宗朝數欲倚爲相會薨甚悼痛詔公自褐衣爲西頭供奉官方功臣子飾輿馬衣服相夸詡公獨折節從儒者游稱道六經百家之言年十八獻文于朝換光祿寺丞賜銀緋三遷殿中丞推家貲與諸父一不靳愛後姻屬相閔恨更引公爲證公辭不答遂以孝讓聞真宗咸平三年以本官直集賢院與號路楊億中山劉筠潁川陳越成紀李宗諤相厚善億工文章采緝閎肆彙類古今氣象魁然如貞元元和以此倡天下而爲之師公與劉陳數公推轂趣和之既乃大變景德祥符間號令彬彬謂之爾雅而五代之氣盡矣朝廷有所論議公與諸公未嘗不在善讐書不妄下朱墨凡祕書更公手者皆爲善本改祠部員外郎判三司理欠憑由案進刑部賜金紫以兵部爲鹽鐵判官以禮部郎中判南曹移戶部勾院上卽位遷戶部充史館修撰糾察在京刑獄初公與并肩踵武者後往往至達官或且物故公獨巍然與新進治作文書無纖芥舛望士論高之天聖四年始以吏部郎中知制誥俄知禮部貢舉歷判集賢知審官院爲契丹國信使坐舉官不以狀罷修撰糾察司數月復糾察轉右諫議大夫給事中知通進銀臺司門下封駁事景祐元年爲翰林學士判祕閣轉禮部侍郎加承旨兼龍圖閣學士半年擢拜參知政事公于臺閣舊章多所練達性愼密爲上言天下事旣出未嘗顯

斥臧否不多取名。故稱爲長者。明年以戶部侍郎罷爲資政殿學士判尙書省。久之轉大學士遷吏部兼提舉祥源觀。慶歷四年致所事于天子。除太子少傅。聽謝。皇祐元年轉少師。某年八月某日薨。享年七十八。贈太子太傅。公精識遠照。盡性命之理。故未嘗問通塞久遠。所至樂善下賢。雖非輩行。猶與之鈞。當功名之地。人取我否。不爲人所媚嫉。夫怨悔不加諸己。雖哲人猶病之。歷二十官。五學士。皆久次。平除晚節。乃參機務。其恬于進取。不斬黨助。如此。初家產歲入百萬錢。公旣好賓客。諸有名士與之游。盡取爲酒食費。略盡。稍稍腴減。亦不增殖。末年所入歲纔二十萬。捐館之日。家人不能庀喪具。當公之病。天子憫其貧。賜銀三百兩。蓋古人所謂清者。如公等非耶。公之子國子博士從簡。以哀死。苦次亦世服名教者。今葬日薄。禮有易名。用哀遺懿。上之有司。謹狀。

景文集卷六十二

行狀

張尙書行狀

〔案〕狀在天禧四年。那時年二十四。尙未登第。疑屬代作。

張詠字復之。年七十。惟公稟尊嚴之氣。凝隱正之量。粵在羈尹。不借兒曹。巍然志嚮。高自標置。始就外傳。卽覽羣經。書必味于義根。學乃知于言選。家貧無以本業。往往手疏墳史。每有屬綴。輒據庭樹。槁枝而眠。苟不終篇。未嘗就舍。礪若多節。默表大廈之材。居然晚器。弗示良工之璞。太原王搏名知人。見公。愷然異之。獨謂公曰。唐魏文公本生此鄉。故老有言。後五百年。復出一佳士。元精回復。祭酒當之矣。公謝不敢當。興國四年。始游鄴下。與故上谷寇公準推轂引重。時屬鄉里命秀。方國試言。府將雅欽公名。議爲舉首。夙儒張覃者。惻惻有行。疏略少文。公卽以檄謁府。盛稱其長。覃終得薦。公爲之下。龔茅有吉。爵砥相先。讓夷之風。一變河朔。明年。進士及第。釋褐大理評事。知鄂州崇陽。尤厲風節。大江之南。民裕文敝。囚以手而上。下獄爲人而重輕。公廉知其狀。痛繩以法。精力于職。擿伏如神。洗其鏹薄。鎮之忠厚。吏樂其職。多一笑而歸休。民協攸居。或減年而從役。就改將作監丞。著作佐郎。解秩。授太子中允。開掌麟州軍事。夏臺弗靖。西戎方強。公繕起亭障。精明烽火。坐贊叔敖棄羽之策。多參嫪姚穿域之樂。伐謀取勝。四鄙以安。端拱紀元。

天田躬耕轉祕書丞。明年充禮部考試官。已事復倅相州。一懼之年。宜爲親解。百斤之贖。終以懇辭。乞董濮上市征。以便迎養。詔可其奏。月餘。召賜五品服。知浚儀縣。俄爲荊湖北路轉運使。事不諉上。世咨其清。勅罷太守。姦賊疲悞者十數。悉條所部廢格抗敵者百餘事。稜威所振。吏皆股栗。察廉使上其理狀。璽書褒美。三年。遷太常爲郎中。再旬。乘驛赴覲。加錫金紫。翌日。遷虞部。爲郎中。再旬。授樞密直學士。賜錢五十萬。判銀臺通進司門下封駁事。兼三班院。河東大將張永德小校犯法。因笞而死。詔按其罪。公卽封還制書。白上曰。永德爲國牙爪。居天下勁兵處。若以一部曲摧辱主帥。臣恐下有輕上之心。上不納。因不關銀臺而下書譙讓。未幾。果有營兵脅訟軍侯者。公復爭前事。上輒優容謝之。會賊順緣間。坤維搖亂。偏師數萬。鼓行而西。太宗以爲潢池弄赤子之兵。荆棘生大軍之後。疇咨上輔。崇簡守臣。參預武功。蘇易簡白上曰。某甫可屬大事。當一面。若奉將威命。降諭劇賊。陛下高枕永無西顧之憂矣。乃命公知益州。揆日占謝。賜白金一百四十斤。鴻卿出郊。不復內御。子顏引道。初無辨嚴。朝家方以大師未集。留之半歲。公潛簿所賜。上還長府。其秋。遂詔赴部。公終不復言。至道二年。改兵部。猶爲郎中。會丁新昌郡太夫人之喪。恩詔奪服。陽秋之義。不以家事爲辭。禮經所執。亦推順變之大。眞考嗣歷。邇臣均霈。卽拜諫議大夫。歸朝。還給事中。戶部使。七旬。拜御史中丞。咸平二年。知貢舉。杜絕書謁。時稱得人。夏。改工部侍郎。知杭州。五年。移京兆。明年。轉刑部。復爲樞密直學士。再知益州。尋加吏部。猶爲侍郎。景德三年。罷歸。領三班。登聞檢院。奉朝請。

先時生瘍于腦。至是弗損。歸家第。賜環中造適。移狀言上。請外藩。尋知金陵。兼江南安撫使。僭宗成禮。改尚書右丞。昇人以秩滿。願留。卽拜工部。汾雁飲至。又進禮部。皆爲尚書。疾劇還臺。求訪高手。洊刻需頭之奏。願遂角巾之游。魏舒之先行後言。人無知其去位。平津之何恙不已。詔益勉于存神。依違半年。必于得謝。上不獲已。出公知陳州。以大中祥符八年八月一日。齊終于理下。享年七十。嗚呼。景命弗究。宗工其萎。如仁均哀。殲我何贖。邦人改祠而爲諱。道路舉音以過喪。真宗聞訃震嗟。追贈尚書左僕射。以天禧四年十一月二十七日。權窺于陳州宛丘縣孝悌鄉謝村焉。從宜也。公始娶夫人唐氏。卒。繼室以太原郡夫人王氏。卽河陽節度使顯之女。允執婦道。以佐君子。後公三年而歿。子從質。以父任累遷至衛尉丞。居公之喪一月。以毀而夭。女一人。適故內相王公禹偁子嘉祐。母弟說。以公延賞。今爲虞部員外郎。孫四人。曰約。曰綜。曰綽。曰紳。咸以忠厚世其家。公階至正奉大夫。勳上柱國。爵開國公。食封戶三千七百。實戶四百。其大較也。公姿宇爽邁。謀謨沈敏。道駕俗表。氣龍霄極。任節俠。已然諾。不宛不楸。如玉如璧。修詞立誠。博見強志。節書兼兩。賓蓋成陰。佐郡被邊。遭時右武。八螭封而試馬。回策若繁。張魏步以射侯。舍矢如破。總物纖密。紀人遠甚。及司封駁。則詳言粹議。有任隗之沈正。總臺憲。則摧奸觸佞。有傅咸之剛簡。治益部也。宿師屯結。縣官乏食。棹史博手。狂狡敗心。公乃賤售盆鹽。翔貴困米。貿遷鍾豆。諷告鄉縣。民或妄言沮公。公斬之以徇。自是見糧大集。戰士倍氣矣。自不逞挺亂。重城晏閉。主帥王繼恩。上官正。頓師入保。埋根不

遣坐失脫免之。拒居若賈胡之留。公以爲將不親行。衆不可使。乃勸正自當一隊。以賈羣勇。正許諾。行有日矣。公慮其不進。於是椎牛宿帳。具出餞之禮。中坐酒酣。親舉屬軍尉曰。爾曹俱有親弱在東。蒙國厚恩。恐無以塞責。此行當直擣寇壘。盡其醜類。平定之日。東向以報。目見朝廷舉萬年之觴。豈不快耶。若猶老師逸囚。疲民曠日。卽此地還爲汝死處也。正由此東行。突入。詭道兼進。殊死鏖戰。盡俘凱旋。公乃出車勞勩。縱金大會。以次論獲。先命行賞。皆伏公氣決。不敢迎視。繼恩帳下卒。縋城夜逸。吏執以告。公惡與繼恩不協。卽命繫投晉井。一府無知者。先時刦掠之際。誣染尤衆。脅從有狀。歸訴無階。各保營壁。共懷猜貳。公以爲鹿不擇音。旣亡生路。蟲入其腹。懼益厲階。亟下移符。鐫說魁宿。宥其枝黨。縱歸田里。譬以大恩。訖無敢桀及再任也。屬六羸南牧。靈旗薄伐。公慮遠夷爲變。欲出奇以勝之。因取盜賊之尤無狀者。磔死于市。凜然人望。遂臻靖嘉。每吏牘便文。久不得判。公率爾署決。人皆厭伏。罰旣值罪。按無度情。蜀中喜事者。論次其詞。總爲誠民集。鏤墨傳布。雖張敞之爲京兆。時時越法縱舍。黃霸之守潁川。人人咸知上意。無以過之。牧餘杭也。遭民洊饑。方蜡不啓。稻蟹無種。原田若藝。民挾鹽利。以冒公禁者。日數百輩。公一切笞遣。不徇羣法。邏戍入啓曰。法亂如是。人將安禁。公勞之曰。餘杭十萬戶。饑者七八。弗挾鹽利。無復生意。若暴禁之。彼將圓視衡擊。以擾居者。則爲禍大矣。爾曹第忍之。俟其歲定。則大守復以三尺律從事矣。是年雖歉。人無泛命者。(案)文翰類選作從命富家子與婿分財不協。詣府廷辨。壻曰。彼先子有治命。壻七子三。因出遺札。子

不能舉其契。公索酒醉地曰：彼父智人也。當死之日，子方冲孺，託養于壻。苟子有七分之約，則亦死于壻手矣。今當七分歸子，三分歸壻。于是二人號慟，以爲神明。公之操決，率類是也。原其遇二聖也，以功名自任，故力與命偕。顯八座也，以方格見信，故言與行危。本乎直清，貫以忠恕，無乞靈徼福，無人非鬼責。履重剛不險，臨大節不奪。葵藿弗采于猛獸，山川寧舍于駢角。若夫安世之恨謝，翁歸之滅私，大有之文明，小雅之愷悌，公皆兼有其美。惜其未極柄用，遽愆腴理。上欲以爲相者數矣，天之不慙也。悲夫！公雅好著文，深切警邁，以不偶俗尚，自號乖崖。公尤善詩筆，必覈情理，故重次薛能詩，序之曰：放言旣奇，意在言外。議者以公自道也。生平論著，仲氏誦集之，成十卷，以行于代。內外壻之日，無招膺之妾，無雜弔之賓，終齊事而乃瞑。取禪書而頌德，漢廷諸老，恨王駿之不侯。天下之人，爲隴西而流涕，斯非遺愛遺直，立功立言之極歟。敢撫令猷，以須史闕，謹狀。

馮侍講行狀

馮元，字道宗，年六十三。公之先，平始人。四代祖官廣州。唐末，關輔亂，不敢歸，而劉氏據南海，僑斷士人，故三世食其祿。太祖定交廣，公之禰本劉氏，曰：御國除始，爲王官，授保章正。老病免，遂占數都內。公少嗜學，保章君不欲公疇其業，使從故僕射孫宜公授五經大義。又友博士崔頤正，逮冠，彊立博覽。外囁囁若不足，中敏力甚。自經典故訓，祖襲師承，穿穴莛楹，皆能駕其說，浸弄翰爲詞章，默而有沈鬱之思，出入服喪。

衣習矩步。如大賓祭。鄉人化其謹。至以俚語諺之。不妄交游。惟樂安孫質、吳陸參、譙夏侯圭相友善。三人皆直諒而材。故號四友。家貧。盛冬無薪燎。夜輒市甌酒。與圭對經研摧。一再酌以自溫。或達旦不眠。真宗大中祥符元年。由進士調臨江縣尉。再葦罷。會講員缺。詔令集吏能明經。得自言試可。公往應令。時諫議大夫謝泌領選。精果有風鑒。見公儒者。嘻笑曰。吾聞古治一經至皓首。生能盡善也耶。對曰。達者以一貫之可矣。謝奇其對。因挾精義疑晦者。廷問參詰。公條陳詳諳。言簡氣愿。謝抵掌嗟伏。卽日聞上。授國子監直講。由是名震京師。公卿大夫家爭欲屈公授道者。久之。遷廷尉平。又兼崇文院檢討。其八年。程覆俊選。公待詔殿中。帝讀易至泰卦。命說其義。公旣道繇象云云。因本君臣感會所以輔相材成者。帝悅。賜五品服。稍親近之。禁中建龍圖閣。度藏祕冊。置學士待制等員。爲摺紳譽處。時帝用尙書工部郎中李虛己。兵部員外郎李行簡待制。是時。公仕資淺。故以太子中允直閣事。閣蓋由公始。數召入。與二李賜清問。說易盡上下經。帝嘗稱公誦說通而不泥。言外自有餘趣。非專門一經士也。俄改三品服。天禧元年。以諫議大夫假節使契丹。還。遷太常丞。兼判禮院。吏部南曹。先是。今上在儲闈。帝欲得肅艾長者。使之勸學。訪于宰相。時太尉文正王公以公對。或者謂公年差少。罷不用。更用博陵崔遵度。四年。遵度卒。帝卽擢公左正言。兼太子右諭德。代其任。他職如舊。初。文正聞公名而未之識。一日。召至第。先使諸子質經義。密視其人。淹粹亮格。乃自見之。授以老子。他日。令詣府。與執政衆試。已而爲帝言數矣。故公之顯。文正力焉。公由孤生。

挾儒術進出入十餘年。銷玉華綏與諸儒獻歌頌。數得進見兩宮。所以褒禮。賜予尤渥。便蕃光明。爲時宗國器。當世休之。今上嗣位。改尙書工部員外郎。升爲直學士。兼侍講。未幾。孫宣公亦入露門。執經遞進。公得孫同列。以爲寵。孫得公。亦自以知人爲多。兩人提衡諷導。上益嚮學。俄兼會靈觀副使。知通進銀臺司。兼門下封駁事。天聖元年。判登聞檢院。明年。判國子監。三年。改禮部郎中。五年。同知貢舉。時天下偕計參倍。公協力程綜。片善必錄。雖鈞捶臬平。不訂其公。未幾。正爲學士。當是時。天子念先帝盛烈。裁定信書。爲一王言。故武卿中山劉公筠。今資政殿學士常山宋公綬。丞相潁川陳公。同領史事。已而丞相爲開封府。浩穰劇三輔。乃罷史官諸公。亟以公請。詔從之。書閱兩朝。論次筆削者衆。至是。褒懲謹嚴。近古風烈矣。其十一月。燎祭南郊。爲鹵簿使。七年。召入翰林爲學士。凡三禁職。皆天下選。而公兼有。且優爲之。又判尙書都省。俄爲三班院。歲餘。改吏部郎中。八年。以國書成。進諫議大夫。充史館修撰。九年。爲吏部流內銓。兼羣牧使。明道元年十月。旣考室。謝享宗廟。又爲鹵簿使。以敕令例。遷給事中。明年。耕籍田。使任如廟禮。俄爲莊獻莊懿二太后園陵鹵簿使。前此莊懿之未祔也。崩都城右郊。公嘗假鴻臚護其葬。及梓宮之遷。斥土沮溼。近戚詆公監視亡狀。十月。解翰林學士及侍講二職。出守河陽。辭得見上。但頓首引咎。自請治郡。滿三年。奉計以報。會太學官屬叩丞相府留公。柄臣悔。欲弗遣。公固願行。到部。以清靜稱。不作條教。今左僕射王沂公自洛帥入覲。爲上言。馮某東朝雋老。不宜以纖介棄外。上亦意合。卽日馳傳召公。景祐二年春。

二月至自河陽。改禮部侍郎兼翰林侍講學士兼知審官院。復判大常禮院。國子監。公既還朝。自以羽翼舊人。身託勸講。宜出入諷議。不苟默而已。乃獻金華五箴。弼違告猷。詞兼婉切。上納其戒。優詔答之。會上留意雅樂。閱經文殘缺。規創大典。夏四月。詔公領修樂書。俄復爲南郊鹵簿使。管祥源觀事。明年七月。書成。上號其書爲景祐廣樂記。特還戶部賞勞也。公素有蹠蹠。不堪趨拜。四年春。病寢劇。告未滿三月。會小瘳。公自力造朝。未幾。病復甚。氣上逆。害言語。後四月戊戌。終于正寢。上聞訃震悼。以本曹尙書告其柩。賻錢三十萬緡百匹。膠米牢具稱之。愍贈之所以優加。君臣之際深矣。公之配夫人周氏。封臨汝郡。無息。以兄之子大理評事諱爲嗣。公歿。夫人命諱以衰經。卽次于殯。東會詔到門。問公親屬。夫人卽表公遺命。詔可。擢諱衛尉寺丞。諱子二人。釋褐竝爲將作監主簿。卹孤厚終之恩。乃如是。是其德已侈大哉。公自襁巾至捐館。進階及勳各六詔。爵五封。戶五加。而再實其食。如今署焉。志閒素恬于仕進。無表襮之飾。雖當路諸公。牽賀弔一與衆往。異時不造也。門無雜賓。惟經生朔望承問。及搢紳道義交數人而已。接士以禮。雖新進後出與之鈞。終日談便惟謹。無虛言情色。是以受詔八主戎客于都亭館。由愼恪以得之。不呼僧及道士。嘗執親喪。自括髮至祥練。皆按禮變服。未始爲世之所爲齋薦者。惟卒哭後。遇祭日。與數門生誦說孝經而已。罕語浮屠氏。亦不誦言排訾之。薰蒿襪祓可以動氣。餒者皆不動近。不問家產增狹。晝治官事。夜還讀書。誓御亦簡其面。故能多識博練。自臺閣文書。故新品式。叢夥紛龐。有所咨訪者。咸能記之。太學。

禁閣容臺三局閱二十年仍其任。本公不愆不忘故也。尤精易及揚雄方部學。初公七歲。母夫人令授易。是夕夢公吞紺蓮。夫人旦而撫公曰。兒善讀此。後必貴顯。真宗果以識拔。晚年愈刻志。率三日一讀。又欲爲子雲諸首作章句。且患宋衷、陸績、范叔明、宋惟幹漫漶舛馳。思盡黜之。最後得唐王涯註。以爲差近。先作釋文一語。欲遂因王說而補正之。亦終不果。公嘗預注先帝集。同修鹵簿記。校後漢志、孟子及律并義疏。采獲是正。多得其真。同修玉牒。分撰國朝會要。未克就。生平著述無編次。家人搜摭得數百篇。精緻平粹。及在禁署。益邇雅務。爲溫純。而采加焉。居三城。作詩百餘章。推己指物。曠而不怨。有雅人餘風。性寬厚多恕。當官下。未嘗以罪平鵠吏。吏亦畏其明而安其仁。樂道人之善。好與人爲善。每議事。不肯自意出。大者薦之二府。小者與其屬聯請。類多不可紀。公一無建白者。其遠名若此。然內剛有守。不流于衆。初善音者。取上黨黍縱累爲尺。因裁十二律以獻。遂改大樂鐘石以合其私。老師宿工皆首鼠不敢議。後有建言其非者。上未有以決。遣中人卽太常下舍問公。新樂以縱黍定尺。寧有非耶。公卽擿班固律歷志。唐令兩說付中人。因對古者橫黍度寸。今以縱亂橫。其法非是。中人馳入。明日。上坐邇英閣。語公曰。向攷正大樂。患其淺高而急。今也下而緩。二者不得其中。失在律。卿言是矣。因出橫黍新尺示羣臣。比縱尺差二寸一分而弱。以校衡斗皆不讎。當是時。微公言。幾無發其謬者。假有之。果且不能取信于上。傳曰。仁人之言。固溥而利。歟。公前歿三日。屬于一二僚執曰。吾仕願素足。今無一私以干縣官。惟是窀穸累諸君。已而得遺

禮之文。諄諄納忠。訖無他語。用是中外尤痛惜之。公友隴西李公叔。勅故吏相諷以終事。嗚呼。公有王佐之才。不自顯。雖持囊珥筆。在省戶。爲名命。訓辭所出。裁十二三。使公當其時。稍自崖異。不難于進。益發素蘊。幸而十四五。且次入衡弼。不爲婆娑連蹇如今。章章矣。雖然。命有屈于公。公無不嫌于道。使素概清埃。奮厲無窮。薄夫敦。夸夫懼。百世之後。呻簡想風者。以輩魯臧文仲。漢賈誼。董仲舒。此彼相易。寧自失得間耶。祁曩以冑筵儀範。刊綴音典。皆爲公屬。及此緒訓。又參聞之。故公治行之全。頗獲詳究。今日月有期。官在三品。法當得諡。謹用第述。上于有司。節惠受名。請遵故實。謹狀。

荆南府君行狀

〔案〕范鎮撰宋祁神道碑。中丞名紳。乾封。令名駢。霍丘。令名耀。荆南。推官名玘。

宋氏本廣平望族。代有冠冕。中葉避地。始來浚都通州。府君事唐昭宗。位至御史中丞。坐法貶州司馬。子孫蕃衍。爲東畿著姓。乾封府君事後唐。歷晉漢。多爲劇邑。清尚素節。鄉品亡二。霍丘府君弱冠秀發。通王霸之術。是時諸侯據藩岳。招豪英。因感艱運。濡足當世。由是連應滄魏。究冀之辟。周世宗用兵淮上。鋪敦朶入。府君自田里獻書行在。陳滅吳之策。世宗奇其材。拜真令。隨王師東下而安輯之。淮人忘亡。遭內憂去官。宋受禪。銓符追集。調蔡州團練判官。謝病不行。俄而易簣。年四十八。先府君蚤孤。事母賈夫人至謹。諸兄以宦學遠或千里。近或數年乃還。惟府君朝夕瞻省。以孝聞邑中。里人邢敦盤桓遯世。罕通謝問。獨以府君爲益者之友。治春秋三家。長左氏。賈夫人之喪。毀瘠如禮。年四十。親友勸以仕。始游京師。太宗端

換二年明經及第爲寧州襄樂主簿時四方饑道數棘外臺鄭文寶檄府君行部中董索輜護如令而辨大見褒識代還調江州司理參軍慨然歎曰是不足爲仁耶位無大小顧力行何如耳因精思于訊鞠爰書之間屬邑尉邢積捕疑盜數十人鍛錮周密移之郡獄太守李朝以證左明具卽俾論死府君疑有枉狀因微挺囚械物色以問之囚對不讎乃自白于朝朝弗察府君卽申牒大獄四十日所以防冤誣盡情實今旬甲未決不敢如教朝大怒居數日鄰州獲眞盜自首于官傳檄株送朝執書慙且駭曰掾其神乎州界有行商部輜重夜徑澤中將宿佛祠值姦人前殺羣僧廷內狼籍商人入寺蹀其血乃覺因輕騎邏去曉逢邏者見衣履有汙執以爲賊傳攷數獄商遂自誣府君以爲是輩操奇贏舉千百計胡怨而蹈死耶因屏左右誅以好語商恐懼辭卒不變府君猶卻其獄夜據案寐恍惚若有人乘馬至廳事自稱鄭使者呼曰誤矣府君警寤遽召侍卒緩其繫盡取成牘焚之左右雜然謂不可遲明有姓鄭者詣官告其謀盡獲支黨商乃免其慎諦精感如此前後閩郡將數人其間侍中文懿馮公尤所欽待殿省丞呂奉天峭刻臨州少所推薦器府君仁隱材幹凡再加保述居官八年弗得代時故貳卿文定趙公以美俗使江表廉其淹恤疾置言狀是冬集吏部復掾常州三考皆最掌獄凡十年所蔽數千無一誣諉者每有重辟必持案諗囚爾罪應死盡召家人使之相見飭嚮衽席時其早晏未始妄加撻掠須其情究意訖然後行決囚皆叩顙感泣旣誅又爲人設一僧使誦經懺罪自是州人習聞之其後囚每伏法卒呼曰若物化有知

當爲宋府君作狗馬償厚德。九江毗陵二郡父老至今能言之。俄爲光州錄事參軍。安州應山令。江陵府從事。府君謙謹修潔。廉靜樂道。薄于自奉。裕于施物。筭無兼衣。案無累殺。以己不知人爲疚。不以人不知己爲恨。冲猷隱量。粹焉莫見其際。恭于接士。而不諂也。力于事神。而不祈也。不援上以苟求。不詭遇以取獲。居六官。更三十載。結考十七。訖無玷漏。而閭閻棲遲。終不獲遷。力與命其相戾也。雅性強記。闇誦諸經。及梁昭明文選。以教授諸子。遇家人嗃嗃嚴厲。雖盛暑必正冠束帶。居常諷梵書。日十數過。以爲常。讀莊子內篇。至金躍求爲鑠邪。輒以訂己曰。吾終不爲不祥之請。其埋照含厚。蓋性之也。天禧元年。調都下。疾終于僦廡。實六月二十九日。同母昆弟七人。長曰瑋。終安州雲夢令。次曰琚。曰璩。曰現。咸先歿。弟曰昱。舉進士。早世。曰位。終國子博士。五合姓。曰高氏。曰二王氏。繼以鍾氏。最後朱氏。朱夫人後府君十三年而終。三子。長曰邠。早夭。仲曰郊。季曰祁。邠後王氏出也。郊。祁。鍾出也。府君之歸全也。朱夫人留止南方。獨郊侍疾。及斬焉。在疚。力不克葬。乃權窆京城之偏。後八年。郊與祁皆進士及第。嗚呼。小子以治命之重。不敢殫滅。天假殘息。興于零丁孤苦之餘。遭時樂育。進服嘉會。非府君之儲德憑厚。義方清白之所庇。疇能及此。然祿之弗逮。哀亦罔極。幸天子推孝治之化。篤褒親之典。乃以天聖五年郊祀。詔書一追贈府君爲太子中允。封朱夫人爲壽光縣太君。明道東耕。再贈屯田員外郎。追封鍾夫人爲潁川縣太君。景祐二年。圓丘禮成。進加今贈。今得吉卜于許州陽翟縣三封鄉之南原。以景祐丙子孟冬之癸酉。舉公之柩。以鍾氏朱

氏二夫人合祔焉。恭惟先府君庸言成規，庸行成矩，凡有諸訓，皆可爲士林景法，而光靈寢遠，竹素靡傳，摧慟追懷，百不獲一，謹摺撫崖略，以備誌墓之實，謹狀。

叔父府君行狀

（案）府君名位

府君少孤，逮冠，喜遊俠，重然諾，居鄉里，以風義自重。旣而感曾高以降，皆用儒術進，始慷慨從學，通戴氏禮及周儀二書。太宗端拱元年，以經明釋褐，補隴州隴安簿，再調虔州石城簿，代還，以結課尤異，遷耀州觀察推官。州與霍丘府君嫌名音協，固乞改擬，不聽。秩滿，又調靜安軍節度推官。時故尙書任中正以時望鎮左蜀，幕籌郡政，一以咨之。府君敏咨而才，感知己之遇，罄露風力，助成綏輯。任公密啓其狀，冬，進改大理丞，出宰大名府朝城縣，以建封之慶，就改太子右贊善大夫，仍賜五品服。移宰河南之登封，祀汾禮畢，列進殿中丞。俄而通判麟州，又移鎮戎軍。天禧初，有司稽勞，轉國子博士。晚節連倖邊守，皆西陲勁兵處，邊土慘烈，寒中肌骨，腴肉銷盡，壯趾成災，及還臺，不能拜伏，輒取長牀臥里舍，痼瘵寢劇，遂臻大病，以天禧二年某年月日，啓手足于京師。前夫人王氏，後夫人孫氏，封長安縣君，皆前卒。子一人，曰郁，以族父之蔭，今爲榮州錄事參軍。同祖兄六人，曰瑋，終安州雲夢令，曰琚，曰璩，曰現，皆文行孝友，不及仕途。曰珣，終江陵府節度推官，贈工部郎中，曰昱，舉進士，竝先去世。府君最幼，謹按府君天資強濟，于法令尤邃，前後操吏治，詳民隱，文牘倥偬，羣慮眩而不解。府君一見，皆唾掌立決，情得舒露，人人厭伏，故所莅之政，旬

未浹而聲已馳矣。使輅郡將爭爲薦寵。忠愍寇公撫全魏。聞朝城之政。恨知君晚。自本邑檄召權貳府事。欲日見音采。其爲名卿所欽挹如此。精心勁氣。老而彌壯。與江陵府君華顛從官。比諸昆最壽。而姿宇風韻。纖微克肖。雖近親昵友。或不之辨。逮末疾淹久。聞江陵之訃。因而易簀。孔懷之痛。可謂至焉。自稱諱以來。橐窰都外。由羣從而上。悉葬故塋。及府君昭穆益卑。容竊無所。其孤郁與兄子郊等。別啓新城于許州陽翟縣三封鄉之南原。卽以今歲孟冬之癸酉。奉江陵及府君之柩。偶穴同兆。且以終手足之愛。從象數之吉也。幽礎辭刻。必咨宗匠。是用直敘官伐。概舉遺烈。不敢文致。以備論次之實云。謹狀。

景文宋公集卷第十六

律詩

官舍二首

南榮坐炙野人暄。官謗心知鶴有軒。畫餅竊名真不食。銜枚邀寵更無言。楚辭云。願銜枚以無言。常被君之渥洽。嵇齋書簾

吹塵度。蔣徑賓。綦暈。蘇班。事國愛君情未已。此生踈蹻負丘園。
病骨支離釜粟豐。臥看瞰采照牆東。不材天與山中養。飽食人嗤柱下工。大府翩翩慙奏記。閑齋咄咄厭書空。脩然慵態知難畫。手按鳴弦目送鴻。

試秩祕書省

見聚珍本卷二十三

景陵乾明院湖亭

見聚珍本卷十四

江上阻風

見聚珍本卷二十四

公齋植竹

對植同奇樹。扶疎對近軒。舊經梁苑賦。初結太山根。就簡供書刻。乘秋爽些魂。鳶風朝作籟。鶴露夜留痕。
招隱宜先桂。忘憂可並萱。會當充鳳食。薦實帝家園。

附佚存叢書殘本景文宋公集

卷第十六至卷第二十

卷第二十六至卷第三十二

卷第八十一至卷第八十五

卷第九十六至卷第九十九

卷第一百單一至卷第一百單二

卷第一百單七

卷第一百十八至卷第一百二十五

天瀑山人跋

中園殖叢蘆

我慙散質山中養。君結孤根江上來。相對中園兩無用。菰蘆何處有奇才。

樹柳

爲愛當年濯濯姿。動春搖霧不勝垂。條供越絕千絲網。葉鬪章臺半額眉。肯共桑榆悲日晚。寧同枳橘過江移。待君合抱相看歲。定是金城洒涕時。

答安陸龐掾

見聚珍本卷九

郡將夜醺分貺齋

見聚珍本卷二十三

春霽

見聚珍本卷十五

黃注昆仲赴舉

見聚珍本卷十四

俊上人遊山

股錫飄然指上方。翠微巖腹掩鷹房。江山極睇才多助。竿木投機戲有場。麝墨洗餘池溜變。玉礬清極茗華香。秋風莫負重來約。淨社霜蓮徧碧塘。

州將病免檄委郡事

郡將移書臥閣頻。假提千騎出班春。校中事免時髦諠。欲作宣明面向人。

晚思見聚珍本
九題作吏上

祇役道中二首

淩落無容物。嶽嵒可笑人。唯當荷農笠。不稱薦華紳。宦味真韞鑠。生涯累水薪。窮途計安出。祇是有沾巾。絮亂東風急。花飛雜樹稠。離家王粲恨。贈婦彥先愁。樵浦連橋度。旗亭數蓋留。癡人了官事。歸約誤楂頭。

鄰郡移書覆獄見聚珍本
卷二十三

郡界閔雨州將率官屬禳禱

劬農方狎野。熾旱嘆焦原。六幕沈雲族。千箱害稼孫。都人望天漢。國相閉陽門。盛怒風生穴。汗斜祝有豚。征徒休道樾。汲缶涸中園。米價高何許。癡人遂不言。

自詠見聚珍本
卷十三

詠史見聚珍本
卷二十四

過安陸舊居隣里相送見聚珍本
卷十七

泌陽王介夫見聚珍本
卷二十

兵部學士移鎮昭潭

檣拂南雲幟。帛蘭再麾湖。外嘆違顏。封君比籍千頭橘。瑞祝標祠九向山。迎吏出郊驅弩。簾。齊兵下席掩。

刀環漢條緩布裘書降後乘蒸青幾兩還。

孫景隨侍赴舉

見聚珍本卷十四

早濟江步

見聚珍本卷二十

夏日

六幕風輕晝刻長。地形卑濕近南方。人揮羽翣依林樾。綆續金瓶下井牀。雲路飛鳶愁跼跼。玉徽流水怨湯湯。尸官盛府中乾甚。久飲臺冰未覺涼。

晚春至自襄陽

刀頭歸約月殘時。棐几流塵蒲兔枝。陰地雨蛙欺鼓吹。後園煙茗老槍旗。風回曲榭花英聚。泉瀆坳堂蘚暈移。臥看屋梁周粟飽。不嫌五管號支離。

題僧惠昇壁

何年飛虎錫。此地鎖鷹房。水入禪心定。花飄供械香。高談犀飾塵。清啜茗成槍。千騎嘗留此。籠紗照屋梁。

景政郡牧
率留詩筆

漢南州將按行江涘以詩見寄

見聚珍本卷十八

南亭獨矚

在景陵見聚珍本卷十八

州將按行隄上

十萬隄封限迅流。騰裝清曉徑春疇。駐車楚老漿盈野。勸築睢陽杵有謳。梅暖晚香薰宿館。雪天零霰犯輕裘。桑郊尅日迎歸旆。遙認驪駒最上頭。

楊初歸九江

方領思歸集鸛庭。樵風千里漾舟舲。歌翻桃岸雙飛鵲。夢繞天鄣九疊屏。上苑昔游賦飄雪。故林良友望賢星。遲聞乙奏蓂雲幄。紫桂官窠襲袂馨。

挾彈林下

見聚珍本
卷二十三

楊備永嘉市征

見聚珍本
卷十八

羈思

三年官牒託東侯。旌蕩危心斛貯愁。一命鴻毛徒許國。單身螢火若驚秋。

州舉俊民以藝中第爲詩馳賀

曾聯郡將署鄉書。目見兩關賣出符。奏頌一揮雲落紙。賜袍三浴蕙飄爐。高軒並照連乾錦。飲膳分頒葢莆廚。病幕日期迎畫繡。塵容甘預弩前驅。

聞新榜恩除異等輒成自詠

見聚珍本
卷二十三

溪亭

規日平空晚。澄波極望鮮。簾飛故陶瓦。梁負會稽椽。戰綠低寒杜。漂紅泊晚蓮。黃昏無限意。江月對娟娟。

悼祚禪師二首

見聚珍本
卷十一

獻外臺王侍御

見聚珍本
卷十三

祇役鄰郡道中曉發

見聚珍本
卷十四

七夕

見聚珍本
卷二十四

送常熟尉錢訪

見聚珍本
卷二十一

送楊偕太傅知淮陽軍

下拜親膺一札書。隋河風旆送行轡。曉辭漢署茅留絕。暮聽廉歌袴換襦。方志貢珍傳磬錯。客庖羞品盛

魚腴。雙旌引入柔桑陌。少駐驂驪將美鬚。

送楊子奇赴辟潭淵

老避嘲師晝不眠。喜聞書辟冠初筵。車陪魏館鳴笳路。食對何侯下箸錢。使驛馬歸催露檄。學帷鱣墮晦餘編。知君此舉伸知己。寧似他人有一天。

送貴溪尉周懿文先輩

見聚珍本
卷十八

送蒙城簿謝曄先輩見聚珍本卷十一

送江陰簿江楚材先輩見聚珍本卷十一

送史溫虞部佐郡四明見聚珍本卷十四

直舍飲餞楊子奇見聚珍本卷二十三

寄鄭天休天休兩賜手問會迫賤事不獲修答見聚珍本卷十八

聞後苑錫宴見聚珍本卷十三

反舌見聚珍本卷二十二

故文節公哀辭三解

早傳黃石系。未伴赤松游。暴疹驚牀蟻。深恩賜養牛。谿璜俄碎玉。川楫遂藏舟。蕭相今無嗣。夫人紹鄮侯。
順采思忠藎。宣謀嘆巧勞。慙遺無一老。投弔剩三號。撤奠哀笳引。追榮斂衾褒。欲知馮厚慶。第覽得傳刀。
霜露才嬰疾。龍蛇已喪賢。神騎尾星次。家託寢丘田。長樂申君弔。東堂罷禋筵。佳城白日掩。從此卽千年。

景文宋公集卷第十七

律詩

送餘姚尉顧洵美先輩見聚珍本卷八

章判官詵赴吳興幕見聚珍本卷十七

辯才少白師歸天台見聚珍本卷十

孫沆從事宰吳興邑見聚珍本卷十六

程密學知益州見聚珍本卷十六

寄獻澶淵太傅見聚珍本卷十六

張屯田知兗州當按察畿縣見聚珍本卷十六

同年梅鼎臣赴鳳翔幕兼省覲時君家學士鎮分陝見聚珍本卷十四

王子野學士同理蘇臺

姑蘇奧絕冠東南。才子監州奉詔函。賜被襦歸廳久冰。去樵風分過舳相銜。菽疇莒葉耕刀利。溢釀梨花
醉鳥攬。一水貫都無憚遠。錦鱗雙尾待來鍼。

中山公損疾二首 見聚珍本卷十六

同年譚綜掾江陵

鄉山湘雲外。行轅楚塞東。不辭淹拔萃。聊欲辨無同。暝紫生寒岫。踈丹點暮楓。登樓有歸訊。爲附北歸鴻。

了淨歸天竺寺 見聚珍本卷十七

九日食餽有詠 見聚珍本卷二十四

龍圖蔡學士鎮高密 兼過鄉墅

厭直坡。變引郡章。玉虬移刻對清廂。留符懸避難宮籥。公先有西洛保釐之命。以就養懇乞東藩。懷綬貪過白晝鄉。書閣迴巢

雙鳳羽。詔泥殘和五芝房。追鋒只恐歸期迫。肯蟹腴魚早計嘗。

對菊有感 見聚珍本卷二十四

元處宗安化簿 見聚珍本卷十一

晏寢 見聚珍本卷二十四

中山公鎮淝上

長鬣生楚滿帳前。甘棠載憩示優賢。蕩函握節中軍府。奎字成鉤寶閣天。丹匕去尋鴻苑錄。佛花來供淨名禪。朝家入有三公拜。未信東山得久眠。

黃泌昆仲歸江西

藝樵殫楚桂。裘掖厭京塵。別路雙黃鵠。還家兩玉人。書園飄竹粉。鄉樹老梨津。電韻盈歸褚。中州賞有真。

同年吳穀尉烏程

見聚珍本卷十

智成上人奉陪中山公赴淝上

見聚珍本卷十二

送蕭山宰劉寺丞

見聚珍本卷十六

同年王聖源南都講授

聖源嘗以事免職

刻意悲愁髮未華。詣曹頻費杜陵嗟。歌緣郢客高難和。璧是秦人誤指瑕。綠底恩書褒振滯。烏衣羣從慶還家。離宮萬戶經庠盛。卻對諸生坐絳紗。

送同年孫錫句簿巢縣

見聚珍本卷十七

冬日野外三首

見聚珍本卷八

直舍讎理律書呈同舍二首

舊文新札儼成行。柏燠微開帙氣香。天下書多殊未見。顏生應笑下雌黃。經筵敢倦刀刊梓。國典將追鼎鑄書。靜對闕疑還閣筆。不知三古字爲魚。

楊都官日嚴赴鄆州

見聚珍本卷十七

廢鄭河

民問呼此名或曰即古洧水河熊塞惟春夏汙潦所集見聚珍本卷八

家居

賃廡接中林。迷塗感慨深。窮年不材木。提月退飛禽。官宇昏投版。私囊利挫針。病呻無用怪。不是顯時吟。

民廬

衰翁好藏密。移病此僑居。白眼慵迎客。青泥勑樸書。風窗殘晝網。煙落暗春樗。惟有伊蒲士。相從亟飯蔬。

舒鴈

莊周悲殺鴈。本爲不能鳴。寧識山陰誤。能鳴亦就烹。

邑居

暖襖裘貂病骨輕。茨簷窮伏廢將迎。族庖投刃喧羊肆。賃廡既邇市道屠相尤雜溪子擎牙近禁營。回近亦多連營正似安仁閑居賦中雲破日痕絙巘道。雨殘烟脚媚萋英。傳聞內史輕租契。時郡圻例減民租私約吾農對耜耕。

早春近野

見聚珍本卷二十四

玉玫瑰

見聚珍本卷六

黃薔薇

剝藥染新繭。插鈿成密房。仙人文玉字。宮女道家裝。聞說藥間露。能令肌骨香。

千葉牡丹

濯水錦窠艷。頽雲仙髻繁。全欹碧槲葉。獨占紫球欄。誰謂萼華極。芳心多隱桓。

酴醾

來自蠶叢國。香傳弱水神。折醒疑破鼻。併艷欲留春。勿以媚蘭末。誤霑韓壽巾。

金雀

見聚珍本卷六

眞珠龍柏

見聚珍本卷六

四季

見聚珍本卷六

木蘭

吳王宮裏樹。春晚紫房開。秀比華夷重。香蒙菌桂猜。本草云。葉氣味辛香不及桂。無輕衆芳喻。曾照女郎來。

棣棠

見聚珍本卷二十二

玉蘂

唐昌觀中樹。曾降九天人。鑾駕香何許。雪英如舊春。豈無遺佩者。來效捧心顰。

茶蘂花

媚叢無奈密。柔蔓不勝長。非隣粉自白。似俠骨中香。不分櫻桃艷。名先播樂章。近世民間雜曲始有茶蘂花者。

送保定張員外

見聚珍本卷十五

晴雲

春空無際碧。雲意靜悠悠。盡日隨風馭。迎昏抱月鉤。正宜銜迥隴。強欲蔽層樓。宋野何須問。鴻濛正掉頭。

春堊勸農事

見聚珍本卷十一

隴西都尉禪會圖

見聚珍本卷八

訪李生野墅

見聚珍本卷二十

南齋二首

見聚珍本卷九

道中見問津者

欲問迷津意。都緣別徑多。亡羊曾自此。老馬欲如何。旁午晨車邁。間關夕蓋過。不須貪遠客。危恨寄風波。

讀張巡故事

見聚珍本卷九

抒歎

寒日不我駐。歲陰生事微。孤懷百感萃。雙鬢二毛稀。樵突沉殘桂。塵編擁故韋。況無安邑累。身託故山薇。

月中嘲鵲

月馭初明露掌西。翩翩猶伴夜烏啼。架巢樹冷空三匝。卻是鳴鳩得穩棲。

